

杜工部詩集

冊一

卷之四

杜工部集

四時雜要

集

四部備要

集部

上海中華書局據玉鈎草

堂本校刊

桐鄉 陸費達 總勘

杭縣 高時顯 輯校

杭縣 吳汝霖 校

丁輔之 監造

杜集槧本不下數十百家箋釋註解言人人殊矣余少嗜杜詩手鈔口誦恆以一編自隨中年汨沒簿書有此事遂廢之感武林爲山水勝地量移來此因病得閑稍理故業取舊本之善者刊爲袖珍版勞人僕僕舟輿便行篋也箋註概從刪削以少陵一生不爲鉤章棘句以意逆志論世知人聚訟紛如蓋無取焉乾隆四十九年秋八月旣望真州鄭澐書于有美堂

杜工部集卷首

誌傳集序

唐故檢校工部員外郎杜君墓係銘

元

稹

江陵士曹時作

敘曰余讀詩至杜子美而知大小之有所總萃焉始堯舜時君臣以賡歌相和是後詩人繼作歷夏殷周千餘年仲尼緝拾選練取其干預教化之尤者三百篇其餘無聞焉騷人作而怨憤之態繁然猶去風雅日近尙相比擬秦漢已還採詩之官旣廢天下妖謠民謳歌頌諷賦曲度嬉戲之詞亦隨時間作至漢武帝賦柏梁詩而七言之體興蘇子卿李少卿之徒尤工爲五言雖句讀文律各異雅鄭之音亦雜而詞意簡遠指事言情自非有爲而爲則文不妄作建安之

杜工部集卷首

誌傳集序

唐故檢校工部員外郎杜君墓係銘

元

稹

江陵士曹時作

敘曰余讀詩至杜子美而知大小之有所總萃焉始堯舜時君臣以賡歌相和是後詩人繼作歷夏殷周千餘年仲尼緝拾選練取其干預教化之尤者三百篇其餘無聞焉騷人作而怨憤之態繁然猶去風雅日近尙相比擬秦漢已還採詩之官旣廢天下妖謠民謳歌頌諷賦曲度嬉戲之詞亦隨時間作至漢武帝賦柏梁詩而七言之體興蘇子卿李少卿之徒尤工爲五言雖句讀文律各異雅鄭之音亦雜而詞意簡遠指事言情自非有爲而爲則文不妄作建安之

專矣使仲尼鍛其旨要尙不知貴其多乎哉苟以其能所不能無可無不可則詩人以來未有如子美者是時山東人李白亦以奇文取稱時人謂之李杜余觀其壯浪縱恣擺去拘束模寫物象及樂府歌詩誠亦差肩于子美矣至若鋪陳終始排比聲韻大或千言次猶數百詞氣豪邁而風調清深屬對律切而脫棄凡近則李尙不能歷其藩翰况堂奧乎予嘗欲條析其文體別相附與來者爲之準特病嬾未就耳適遇子美之孫嗣業啓子美之柩襄祔事於偃師途次於荆雅知余愛言其大父之爲文拜余爲誌辭不能絕余因係其官閣而銘其卒葬云係曰昔當陽成侯姓杜氏下十世而生依藝令於鞏依藝生審言審言善詩官至膳部員外郎審言生閑閑生甫閑爲奉天



令甫字子美天寶中獻三大禮賦明皇奇之命宰相  
試文文善授右衛率府胄曹屬京師亂步謁行在拜  
左拾遺歲餘以直言失官出爲華州司功尋遷京兆  
功曹劍南節度嚴武狀爲工部員外郎參謀軍事旋  
又棄去扁舟下荆楚間竟以寓卒旅殯岳陽享年五  
十九夫人宏農楊氏女父曰司農少卿怡四十九年  
而終嗣子曰宗武病不克葬歿命其子嗣業嗣業貧  
無以給喪收拾乞匄焦勞晝夜去子美歿後餘四十  
年然後卒先人之志亦足爲難矣銘曰

維元和之癸巳粵某月某日之佳辰合窆我杜子美  
于首陽之山前嗚呼千載而下曰此文先生之古墳

舊書文苑傳

杜甫字子美本襄陽人後徙河南鞏縣曾祖依藝位

終鞏令祖審言位終膳部員外郎自有傳父閑終奉  
天令甫天寶初應進士不第天寶末獻三大禮賦元  
宗奇之召試文章授京兆府兵曹參軍十五載祿山  
陷京師肅宗徵兵靈武甫自京師宵遁赴河西謁肅  
宗于彭原郡拜右拾遺房琯布衣時與甫善時琯爲  
宰相請自帥師討賊帝許之其年十月琯兵敗於陳  
濤斜明年春琯罷相甫上疏言琯有才不宜罷免肅  
宗怒貶琯爲刺史出甫爲華州司功參軍時關畿亂  
離穀食踴貴甫寓居成州同谷縣自負薪採梠兒女  
餓殍者數人久之召補京兆府功曹上元二年冬黃  
門侍郎鄭國公嚴武鎮成都奏爲節度參謀檢校尚  
書工部員外郎賜緋魚袋武與甫世舊待遇甚隆甫  
性褊躁無器度恃恩放恣嘗憑醉登武之牀瞪視武

曰嚴挺之乃有此兒武雖急暴不以爲忤甫于成都浣花里種竹植樹結廬枕江縱酒嘯詠與田父野老相狎蕩無拘檢嚴武過之有時不冠其傲誕如此永泰元年夏武卒甫無所依及郭英乂代武鎮成都英乂武人麤暴無能刺謁乃遊東蜀依高適旣至而適卒是歲崔寧殺英乂楊子琳攻西川蜀中大亂甫以其家避亂荆楚扁舟下峽未維舟而江陵亂乃泝沿湘流遊衡山寓居耒陽甫嘗遊嶽廟爲暴水所阻旬日不得食耒陽聶令知之自櫂舟迎甫而還永泰二年啗牛肉白酒一夕而卒于耒陽時年五十九子宗武流落湖湘而卒元和中宗武子嗣業自耒陽遷甫之柩歸葬於偃師縣西北首陽山之前天寶末詩人甫與李白齊名而白自負文格放達譏甫齷齪而有

飯顆山頭之嘲諷元和中詞人元稹論李杜之優劣曰余讀詩至杜子美云云特病懶未就耳自後屬文者以稹論爲是甫有集六十卷

杜工部小集序

潤州刺史樊

晃

工部員外郎杜甫字子美膳部員外郎審言之孫至德初拜左拾遺直諫忤旨左轉薄遊隴蜀殆十年矣黃門侍郎嚴武總戎全蜀君爲幕賓白首爲郎待之客禮屬契闊湮阨東歸江陵緣湘沅而不返痛矣夫文集六十卷行于江漢之南常蓄東遊之志竟不就屬時方用武斯文將墜故不爲東人之所知江左詞人所傳誦者皆君之戲題劇論耳曾不知君有大雅之作當今一人而已今採其遺文凡二百九十篇各以志類分爲六卷且行於江左君有宗文宗武近知

所在漂寓江陵冀求其正集續當論次云

贈杜工部詩集序

孫 僅

敘曰五常之精萬象之靈不能自文必委其精萃其靈于偉傑之人以渙發焉故文者天地真粹之氣也所以君五常母萬象也縱出橫飛疑無涯隅表乾裏坤深入隱奧非夫腹五常精心萬象靈神合冥會則未始得之矣夫文各一而所以用之三謀勇正之謂也謀以始意勇以作氣正以全道苟意亂思率則謀沮矣氣萎體瘵則勇喪矣言藟辭蕪則正塞矣是三者迭相羽翼以濟乎用也備則氣淳而長剝則氣散而涸中古而下文道繁富風若周騷若楚文若西漢咸角然天出萬世之衡軸也後之學者瞽實聾正不守其根而好其枝葉由是日誕月豔蕩而莫返曹劉

應揚之徒唱之沈謝徐庾之徒和之爭柔鬪葩聯組  
擅繡萬鈞之重爍爲錙銖真粹之氣殆將滅矣洎夫  
子之爲也剔陳梁亂齊宋抉晉魏瀦其淫波遏其煩  
聲與周楚西漢相準的其夔邈高聳則若鑿大虛而  
噉萬籟其馳驟怪駭則若仗天策而騎箕尾其首截  
峻整則若儼鈞陳而界雲漢樞機日月開闔雷電昂  
昂然神其謀挺其勇握其正以高視天壤趨入作者  
之域所謂真粹氣中人也公之詩支而爲六家孟郊  
得其氣焰張籍得其簡麗姚合得其清雅賈島得其  
奇僻杜牧薛能得其豪健陸龜蒙得其瞻博皆出公  
之奇偏爾尙軒軒然自號一家懌世烜俗後人師擬  
不暇矧合之乎風騷而下唐而上一人而已是知唐  
之言詩公之餘波及爾於戲以公之才宜器大任而

顛沛寇虜汨沒蠻夷者屯于時耶戾于命耶將天嗜  
厭代未使斯文大振耶雖道振當世而澤化後人斯  
不朽矣因覽公集輒洩其憤以書之

王內翰序

翰林學士兵部郎中  
知制誥史館修撰

王洙撰

杜甫字子美襄陽人徙河南鞏縣曾祖依藝鞏令祖  
審言膳部員外郎父閑奉天令甫少不羈天寶中獻  
三賦召試文章授河西尉辭不行改右衛率府胥曹  
天寶末以家避亂鄜獨轉陷賊中至德二載竄歸鳳  
翔謁肅宗授左拾遺詔許至鄜迎家明年收京扈從  
還長安房琯罷相甫上疏論琯有才不宜廢免肅宗  
怒貶琯邠州刺史出甫為華州司功屬關輔飢亂棄  
官之秦州又居成州同谷自負薪採椁鋪糶不給遂  
入蜀卜居成都浣花里復適東川久之召補京兆府

功曹以道阻不赴欲如荆楚上元二年聞嚴武鎮成都自閬州挈家往依焉武歸朝廷甫浮遊左蜀諸郡往來非一武再鎮兩川奏爲節度參謀檢校工部員外郎賜緋永泰元年夏武卒郭英乂代武崔旰殺英乂楊子琳柏貞節舉兵攻旰蜀中大亂甫逃至梓州亂定歸成都無所依乃泛江遊嘉戎次雲安移居夔州大歷三年春下峽至荆南又次公安入湖南泝沿湘流遊衡山寓居耒陽嘗至嶽廟阻暴水旬日不得食耒陽聶令知之自具舟迎還五年夏一夕醉飽卒年五十九觀甫詩與唐實錄猶槩見事迹比新書列傳彼爲躋駁甫集初六十卷今祕府舊藏通人家所有稱大小集者皆亡逸之餘人自編摭非當時第敘矣蒐裒中外書凡九十九卷除其重複定取千四百



有五篇凡古詩三百九十有九近體千有六起太平時終湖南所作視居行之次若歲時爲先後分十八卷又別錄賦筆雜箸二十九篇爲二卷合二十卷意茲未可謂盡他日有得尙副益諸寶元二年十月王原叔記

後記

王琪

近世學者爭言杜詩愛之深者至剽掠句語迨所用險字而模畫之沛然自以絕洪流而窮深源矣又人人購其亡逸多或百餘篇少數十句藏弄矜大復自以爲有得翰林王君原叔尤嗜其詩家素蓄先唐舊集及採祕府名公之室天下士人所有得者悉編次之事具于記于是杜詩無遺矣子美博聞稽古其用事非老儒博士罕知其自出然訛缺久矣後人妄改

而補之者衆莫之過也非原叔多得其真爲害大矣  
子美之詩詞有近質者所謂轉石於千仞之山勢也  
學者尤效之而過甚豈遠大者難窺乎然夫子之刪  
詩也至於檜曹小國寺人女子之詩苟中法度咸取  
而弦歌善言詩者豈拘於人哉原叔雖自編次余病  
其卷帙之多而未甚布暇日與蘇州進士何君瑒丁  
君脩得原叔家藏及今古諸集聚於郡齋而參攷之  
三月而後已義有兼通者亦存而不敢削閱之者固  
有淺深也而又吳江邑宰河東裴君煜取以覆視乃  
益精密遂鏤於板庶廣其傳或俾余序於篇者曰如  
原叔之能文稱於世止作記於後余竊慕之且余安  
知子美哉但本末不可闕書故槩舉以附於卷終原  
叔之文今遷於卷首云嘉祐四年四月望日姑蘇郡

守太原王琪後記

成都新刻草堂先生詩碑序

胡宗愈

草堂先生謂子美也草堂子美之故居因其所居而號之曰草堂先生先生自同谷入蜀遂卜成都浣花江上萬里橋之西爲草堂以居焉唐之史記前後抵牾先生至成都之年月不可攷其後先生寄題草堂云經營上元始斷手寶應年然則先生之來成都殆上元之初乎嚴武入朝先生送武之巴西遂如梓州蜀亂乃之閬州將遊荆楚會武再鎮兩川先生乃自閬州挈妻子歸草堂武辟先生爲參謀武卒蜀又亂先生去之東川移居夔州遂下荆渚泝沅湘上衡山卒於耒陽先生以詩鳴於唐凡出處去就動息勞佚悲歡憂樂忠憤感激好賢惡惡一見於詩讀之可以

知其世學士大夫謂之詩史其所遊歷好事者隨處刻其詩於石至成都則闕然先生之故居松竹荒涼略不可記今丞相呂公鎮成都復作草堂於先生之舊址繪先生之像於其上宗愈假符於此乃錄先生之詩刻石置於草堂之壁間先生雖去此而其詩之意有在於是者亦附其後庶幾好事者於以攷先生去來之迹云元祐庚午資政殿學士中大夫知成都軍府事胡宗愈序

杜工部集後記

吳若

右杜集建康府學所刻板也初教授劉巨常今當兵火瓦礫之餘便欲刻印文籍得府帥端明李公行其言繼而樞密趙公不廢其說未幾趙公移帥江西常今亦以病丐罷屬府倅吳公才德充察推王閻伯言

嗣成之德充伯言爲求工外邑付學正張巽學錄李  
鼎要以必成踰半年教授錢壽朋耆朋來乃克成焉  
蓋方督府宣司鼎來百工奔走趨命不暇刀板在手  
奪去者屢矣一集之微更歲歷十餘君子始就嗚呼  
儒業之難興如此常今初得李端明本以爲善又得  
撫屬姚寬令威所傳故吏部鮑欽止本校足之末得  
若本以爲無恨焉凡稱樊者樊冕小集也稱晉者開  
運二年官書也稱荆者王介甫四選也稱宋者宋景  
文也稱陳者陳無已也稱刊及一作者黃魯直冕以  
道諸本也雖然子美詩如五穀六牲人皆知味而鮮  
不爲異饌所移者故世之出異意爲異說以亂杜詩  
之真者甚多此本雖未必皆得其真然求不爲異者  
也他日有加是正者重刻之此學者之所望也紹興

三年六月荆溪吳若季海書

杜工部集卷首

諸家詩話

宋人方惟道兄弟纂錄唐宋以來評杜詩者號曰諸家老杜詩評蔡夢弼草堂詩話一卷悉摭韻語陽秋之類尤爲猥雜今刪補而存之

唐書一事

文宗紀鄭注言秦中有火宜興土以厭之乃濬昆明曲江二池上好爲詩每誦杜甫曲江行云江頭宮殿鑱千門細柳新蒲爲誰綠乃知天寶已前曲江四岸皆有行宮臺殿百司廨署思復昇平故事故爲樓殿以壯之太和九年十月內出曲江新造紫雲樓彩霞亭額仇士良以百戲于銀臺門迎之

唐本事詩二事

李白才逸氣高與陳拾遺齊名先後合德其論詩云

珍做宋版印

梁陳已來豔薄斯極沈休文又尚以聲律將復古道  
非我而誰歟故陳李二集律詩殊少嘗言寄興深微  
五言不如四言七言又其靡也况使束于聲調俳優  
哉故戲杜曰飯顆山頭逢杜甫唐撫言作長樂坡前逢杜甫頭戴笠  
子曰卓午借問別來別一作新太瘦生總為從前作詩苦  
蓋譏其拘束也

白常出入宮中恩禮殊厚竟以疎縱乞歸上亦以非  
廊廟器優詔罷遣之後以不羈流落江外又以永王  
招禮累謫於夜郎及放還卒於宣城杜所贈二十韻  
備敘其事讀其文盡得其故跡杜逢祿山之難流離  
隴蜀畢陳于詩推見至隱殆無遺事故當時號為詩  
史

劉禹錫嘉話三事



爲詩用僻字須有來處常訝杜員外巨顙拆老拳疑老拳無據及覽石勒傳卿旣遭孤老拳孤亦飽卿毒手豈虛言哉後輩業詩卽須有據不可率爾道也

茱萸二字經三詩人皆已道亦有能否焉杜公言更把茱萸子細看王右丞徧插茱萸少一人朱倣學他年少插茱萸杜公爲最優也

禹錫常言白樂天苦好余秋水詠曰東屯滄海闊南讓洞庭寬又石頭城下作山圍故國周遭在潮打空城寂寞回自知不及韋蘇州春潮帶雨晚來急野渡無人舟自橫又杜少陵過洞庭詩落句曰春去春來洞庭闊白蘋愁殺白頭翁鄙夫之言有媿杜公也

歐陽文忠公詩話一事

陳舍人從易當時文方盛之際獨以醇儒古學見稱

其詩多類白樂天蓋自楊劉唱和西崑集行後進學者爭效之風雅之變謂之西崑體繇是唐賢諸詩集幾廢而不行陳公時偶得杜集舊本文多脫誤至送蔡都尉詩云身輕一鳥其下脫一字陳公因與數客各用一字補之或云疾或云落或云起或云下莫能定其後得一善本乃是身輕一鳥過陳公歎服以爲雖一字諸君亦莫能到也

王荆公鍾山語錄一事

暝色赴春愁下得赴字最好若下起字卽小兒語也無人覺來往疎嬾興何長下得覺字大好足見吟詩要一字兩字工夫也

司馬溫公迂叟詩話一事

牂羊墳首三星在畱言不可久古人爲詩貴于意在

言外使人思而得之近世詩人惟杜子美最得詩人之體如國破山河在明無餘物矣城春草木深明無人矣花鳥平時可娛之物見之而泣聞之而恐則時可知矣他皆類此不可遍舉

古今詩話一事

章聖問侍臣唐時酒每斗價幾何丁晉公奏曰唐時酒每斗三百文舉杜詩以證章聖大喜曰杜甫詩自可爲一代之史也

東坡三事

子美自許稷與契人未必許也然其詩云舜舉十六相身尊道更高秦時用商鞅法令如牛毛自是稷契輩人口中語也又云知名未足稱局促商山芝又云王侯與螻蟻同盡隨邱墟願聞第一義回向心地初

乃知子美詩外尙有事在也

司空表聖自論其詩以爲得味外味綠樹連村暗黃  
花入麥稀此句最善又云碁聲花院閉幡影石壇高  
吾嘗獨遊五老峯入白鶴觀松陰滿地不見一人惟  
聞碁聲然後知此句之工也但恨其寒儉有僧態若  
杜子美云暗飛螢自照水宿鳥相呼四更山吐月殘  
夜水明樓則才力富健去表聖之流遠矣

東坡王定國詩集序曰太史公論詩以爲國風好色  
而不淫小雅怨誹而不亂以予觀之是特識變風變  
雅耳烏覩詩之正乎昔先王之澤衰然後變風發乎  
情雖衰而未竭是以猶止于禮義以爲賢于無所止  
者而已若夫發于情止于忠孝者其詩豈可同日而  
語哉古今詩人衆矣而杜子美爲首豈非以其流落

飢寒終身不用而一飯未嘗忘君也歟

蔡約之西清詩話一事

詩之聲律至唐始成然亦多原六朝旨意而造語工夫各有微妙何遜入西塞詩薄雲巖際出初月波中上至少陵江邊小閣則云薄雲巖際宿孤月浪中翻雖因舊而益妍類獺髓補痕也

秦淮海進論一事

淮海秦少遊進論曰杜子美之于詩實積衆流之長適當其時而已昔蘇武李陵之詩長于高妙曹植劉公幹之詩長于豪逸陶潛阮籍之詩長于沖澹謝靈運鮑昭之詩長于峻潔徐陵庾信之詩長于藻麗于子美窮高妙之格極豪逸之氣包沖澹之趨兼峻潔之姿備藻麗之態而諸家之作所不及焉然不集

諸家之長子美亦不能獨至于斯也豈非適當其時故耶孟子曰伯夷聖之清者也伊尹聖之任者也柳下惠聖之和者也孔子聖之時者也孔子之所謂集大成嗚呼子美亦集詩之大成與

王彥輔塵史一事

杜審言詩有綰霧青條弱牽風紫蔓長又有寄語洛城風月道明年春色倍還人之句若子美林花著雨臙脂落水荇牽風翠帶長又云傳語風光共流轉暫時相賞莫相違雖不襲取其意而語脈益有家法矣

葉夢得二事

石林葉夢得詩話曰詩語固忌用巧太過然緣情體物自有天然工巧而不見其刻削之痕老杜細雨魚兒出微風燕子斜此十字殆無一字虛設細雨著水

面爲漚魚常上浮而滄若大雨則伏而不出燕體輕弱風猛則不能勝惟微風乃受以爲勢故又有輕燕受風斜之句至若穿花蛺蝶深深見點水蜻蜓款款飛深深字若無穿字款款字若無點字皆無以見其精微如此然讀之渾然全似未嘗用力此所以不礙其氣格超勝唐末諸子爲之便當入魚躍練江拋玉尺鶯穿絲柳織金梭體矣詩人以一字爲工世固知之惟老杜變化開闔出奇無窮殆不可以形迹捕詰如江山有巴蜀棟宇自齊梁則其遠近數千里上下數百年只在有與自兩字間而吐吞山水之氣俯仰古今之懷皆見於言外此工妙至到人力不可及也

### 詩話二事

隱居詩話云唐人詠馬嵬之事者多矣世所稱者劉

禹錫云官軍誅佞幸天子捨妖姬羣吏伏門屏貴人  
牽帝裾低回轉美目風日爲無輝白居易云六軍不  
發爭奈何婉轉蛾眉馬前死此乃歌詠祿山能使官  
軍叛逼追明皇明皇不得已而誅楊妃也豈特不曉  
文章體裁而造語蠢拙抑亦失臣下事君之禮老杜  
則不然其北征詩曰憶昨狼狽初事與古先別不聞  
夏商衰中自誅褒姒乃見明皇鑒夏商之敗畏天悔  
禍賜妃子以死官軍何與焉唐闕史載鄭畋馬嵬詩  
命意似矣而詞句凡下比託無狀不足道也

夏鄭公竦評老杜初月詩微升紫塞外已隱暮雲端  
以爲意主肅宗也鄭公善評詩也吾觀退之煌煌東  
方星奈此衆客醉其順宗時作也東方謂憲宗在儲  
也



葛常之一事

語韻陽秋曰老杜當干戈騷屑之際間關秦隴負薪拾柁鋪罽不給困躓極矣自至蜀依裴冕始有草堂之居觀其經營往來之勞備載于詩皆可攷也其曰萬里橋西宅百花潭北莊者言其地也經營上元始斷手寶應年言其時也雪裏江船渡風前徑竹斜寒魚依密藻宿鷺起圓沙言其景物也至於草堂塹西無樹林非子誰復見幽深則乞橙木於何少府之詩也草堂少花今欲栽不問綠李與黃梅則乞果于徐少卿之詩也王侍御攜酒草堂則喜而爲詩曰故人能領客攜酒重相看王錄事許草堂資不到則戲而爲詩曰爲嗔王錄事不寄草堂資蓋其流離貧窶之餘不能以自給皆因人而成也其經營之勤如此然

未及黔突避成都之亂入梓居闔其心則未嘗一日不在草堂也遣弟檢校草堂則曰鵝鴨宜常數柴荆莫浪開寄題草堂則曰尙念四松小蔓草易拘纏送韋郎歸成都則曰爲問南溪竹抽梢合過牆塗中寄嚴武則曰常苦沙崩損藥闌也從江檻落風湍每致意如此及成都亂定再依嚴爲節度參謀復歸草堂則曰不忍竟捨此復來薙榛蕪入門四松在步堞萬竹疎則其喜可知矣未幾嚴武卒徬徨無依復捨之而去以唐史及公詩攷之草堂斷手於寶應之初而永泰元年四月嚴武卒是秋公寓夔州雲安縣有此草堂者終始祇得四載而其間居梓闔三年公詩所謂三年奔走空皮骨是也則安居草堂僅閱歲而已

唱酬題詠附錄

登慈恩寺塔

高適

香界泯羣有浮圖豈諸相登臨駭孤高披拂欣大壯  
言是羽翼生迴出虛空上頓疑身世別乃覺形神王  
宮闕皆戶前山河盡簷向秋風昨夜至秦塞多清曠  
千里何蒼蒼五陵鬱相望盛時慚阮步末宦知周防  
輸效獨無因茲焉可遊放

魯郡東石門送杜二甫

李白

醉別復幾日登臨徧池臺何言石門路一作重有金  
尊開秋波落泗水海色明徂徠飛蓬各自遠且盡手  
中杯

沙邱城下寄杜甫

李白

我來竟何事高臥沙邱城城邊有古樹日夕連秋聲

魯酒不可醉齊歌空復情思君若汶水浩蕩寄南征

雜言寄杜拾遺

任華

杜拾遺名甫第二才甚奇任生與君別來已多時何  
嘗一日不相思杜拾遺知不知昨日有人誦得數篇  
黃絹詞吾怪異奇特借問果然稱是杜二之所為勢  
攫虎豹氣騰蛟螭滄海無波似鼓蕩華嶽平地欲奔  
馳曹劉俯仰慚大敵沈謝逡巡稱小兒昔在帝城中  
盛名君一箇諸人見所作無不心膽破郎官叢裏作  
狂歌丞相閣中嘗醉臥前年皇帝歸長安承恩闊步  
青雲端積翠扈游花叵匝披香寓直月團欒英才特  
達承天眷公卿無不相欽羨只緣汲黯好直言遂使  
安仁却為掾如今避地錦城隅幕下英寮每日相就  
提玉壺半酣起舞捋髭鬚乍低乍昂旁若無古人制

禮但爲防俗士豈得爲君設之乎而我不飛不鳴亦  
何以只待朝廷有知己亦曾讀却無限書拙詩一句  
兩句在人耳如今看之總無益又不能崎嶇倚朝市  
且當事耕稼豈得便徒爾南陽葛亮爲朋友東山謝  
安作鄰里閑常把琴弄悶卽攜尊起鸞啼二月三月  
時花發千山萬山裏此中幽曠無人知火急將書憑  
驛吏爲報杜拾遺

使南海道長沙

侍御史唐 扶

道林岳麓仲與昆卓犖請從先後論松根踏雪二千  
步始見大屋開三門泉清或戲蛟龍窟殿豁數盡高  
帆掀卽今異鳥聲不斷聞道看花春更繁從容一衲  
分若有蕭瑟兩鬢吾能髡逢迎侯伯轉覺貴膜拜佛  
像心加尊稍揖英皇頰濃淚試與屈賈招清魂荒唐

大樹悉栴桂細碎小草多蘭蓀沙彌去學五印字靜  
女來懸千尺幡主人念我塵眼昏半夜號令期至噉  
遲回雖得上白舫羈繼不敢言綠尊兩祠物色採拾  
盡壁間杜甫原少恩晚來光彩更騰射筆鋒正健如  
可吞

和

湖南觀察使沈傅師

承明年老輒自論乞得湘守東南奔爲聞楚國富山  
水青嶂灑迤僧家園含香珥筆皆耆舊謙挹自忘臺  
省尊不令執簡候亭館直許攜手遊山樊忽驚列岫  
晚來碧積雪洗盡烟嵐昏碧波迴嶼三山轉丹檻遶  
郭千艘屯華鑣蹠躩絢沙步大旆粲錯輝松門樛枝  
競驚龍蛇執折榦不沒風霆痕相重古殿倚巖腹別  
引新徑縈雲根目傷平楚虞帝魂情多思遠聊開尊

危絃細管逐歌颺畫鼓繡靴隨節翻鏘金七言凌老  
杜入木八瀟蟠高軒嗟予絕倒久不和忍復感激論  
元元

道林

崔珏

臨湘之濱岳之麓西有松寺東岸無松風十里擺不  
斷竹泉瀉入千僧廚宏梁大棟何足貴山寺難有山  
泉俱四時惟夏不敢入燭龍安敢停斯須遠公池上  
種何物碧羅扇底紅鱗魚香閣朝鳴大法鼓天宮夜  
轉三乘書野花市井栽不著山雞飲啄聲相呼金檻  
僧迴步步影石盆水濺聯聯珠北臨高處日正午舉  
手欲摸黃金烏遙江大船小于葉遠林雜樹齊如蔬  
潭州城郭在何處東邊一片青糝糊長卿之問久冥  
寞五言七言夸規模我吟杜詩清入骨灌頂何必須

醍醐

岳麓道林

韋蟾

珍做宋印版

石門道接蒼梧野，愁色陰深二妃寡。  
廣殿崔嵬萬壑間，長廊詰曲千巖下。  
靜聽林飛念佛鳥，細看壁畫馱經馬。  
暖日斜明蟬竦梁，濕烟散翬鴛鴦瓦。  
北方部落檀香塑，西國文書貝葉寫。  
壞欄迸竹醉好題，窄路垂藤困堪把。  
沈裴筆力鬪雄壯，宋杜詞源兩風雅。  
他方居士來施齋，彼岸上人投結夏。  
悲我未離擾擾徒，勸我休學悠悠者。  
何時得與劉遺民，同入東林白蓮社。

杜甫同谷茅茨

唐咸通十四載作

趙鴻

工部棲遲後，鄰家大半無。  
青羗迷道路，白社寄杯盃。  
大雅何人繼，全生此地孤。  
孤雲飛鳥什，空勒舊山隅。

栗亭

趙鴻



杜甫栗亭詩詩人多在口悠悠二甲子題紀今何有

讀杜詩

杜牧

杜詩韓筆愁來讀似倩麻姑癢處搔天外鳳皇誰得  
髓無人解合續絃膠

耒陽

羅隱

楚水悠悠浸耒亭楚南天地兩無情忍教孫武重泉  
下不見詩人說用兵

耒陽杜工部祠堂

徐介

手接汨羅水天心知所存故教工部死來伴大夫魂  
流落同千古風騷共一源消凝傷往事斜日隱頽垣

調張籍

韓愈

李杜文章在光焰萬丈長不知羣兒愚那用故謗傷  
蚍蜉撼大樹可笑不自量伊我生其後舉頭遙相望

夜夢多見之書思反微茫徒觀斧鑿痕不矚治水航  
想當施手時巨刃磨天揚垠崖劃崩豁乾坤擺雷碾  
惟此兩夫子家居率荒涼帝欲長吟哦故遣起且僵  
翦翎送籠中使看百鳥翔平生千萬篇金薤垂琳琅  
仙宮勅六丁雷電下取將流落人間者泰山一豪芒  
我願生兩翅捕逐出八荒精誠忽交通百怪入我腸  
刺手拔鯨牙舉瓢酌天漿騰身跨汗漫不著織女襄  
顧語地上友經營無太忙乞君飛霞珮與我高頡頏

裴說一首

騷人久不出安得國風清擬掘孤墳破重教大雅生  
皇天高莫問白酒恨難平悒快寒江上誰人知此情

孟賓于一首

南遊何感思更甚葉繽紛一夜耒江雨百年工部文

青山當日見白酒至今聞惟有爲詩者經過時弔君

唱酬題詠附錄終

杜工部集卷第一目錄

古詩五十五首

奉贈韋左丞丈

送高三十五書記

贈李白

遊龍門奉先寺

望嶽

陪李北海宴歷下亭

登歷下員外新亭李邕作

同李太守登歷下新亭

元都壇歌寄元逸人

今夕行

貧交行

兵車行

高都護驄馬行

天育驃騎歌

白絲行

秋雨歎三首

歎庭前甘菊花

醉時歌

醉歌行

贈衛八處士

苦雨奉寄隴西公兼呈王徵士

同諸公登慈恩寺塔

示從孫濟

九日寄岑參

送孔巢父謝病歸游江東兼呈李白

飲中八仙歌

曲江三章章五句

麗人行

樂遊園歌

漢陂行

漢陂西南臺

戲簡鄭廣文兼呈蘇司業

夏日李公見訪

同郭給事湯東靈湫作

夜聽許十損誦詩愛而有作

橋陵詩三十韻因呈縣內諸官

沙苑行

珍做宋版印

驄馬行

去矣行

赴奉先縣詠懷五百字

劉少府新畫山水障歌

白水縣崔少府高齋三十韻

三川觀水漲二十韻

悲陳陶

悲青坂

哀江頭

哀王孫

大雲寺贊公房四首

杜工部集卷第一目錄

杜工部集卷第一

古詩五十五首

天寶未亂時并陷賊中作

奉贈韋左丞丈二十二韻

紈袴不餓死，儒冠多誤身。丈人試靜聽，賤子請具陳。

甫昔少

妙一作

年日早充觀國賓，讀書破萬卷，下筆如有神。

賦料揚雄敵

詩看子建親，李邕求識面，王翰願

卜

卜陳作爲

鄰，自謂頗挺出

一作生

立登要路津，致君堯舜

上再使風俗淳，此意竟蕭條，行歌非隱淪，騎驢三十

載，旅食京華春，朝扣富兒門，暮隨肥馬塵，殘杯與冷

炙，到處潛悲辛，主上頃見徵，歛然欲求伸，青冥却垂

翅，蹭蹬無縱鱗，甚媿丈人厚，甚知丈人真，每於百寮

上，猥誦佳句新，竊效貢公喜，難甘原憲貧，焉能心快

快，祇是走踈踈，今欲東入海，卽將西去秦，尚憐終南



山回首清渭濱常擬報一飯况懷辭大臣白鷗沒宋作

波浩蕩萬里誰能馴

送高三十五書記

崆峒小麥熟且吾一作願休王師請公問主將焉用窮

荒為饑鷹未飽肉側翅隨人飛高生跨鞍馬有似幽

并一作州兒脫身簿尉中始與捶楚辭借問今何官觸

熱向武威答云一作言一書記所媿國士知人實不易

知更一作尤須慎其儀一作宜十年出幕府自可持旌麾

一作旗此行既特達足以慰所思一云亦足尉遠思男兒功名遂

亦在老大唐佐切夜歸詩明星當空大同時常恨結驩淺各在天一涯

又如參與商慘慘中腸悲驚風吹一作飄鴻鵠不得相

追隨黃塵翳沙漠念子何當一作時歸邊城有餘力早

寄從軍詩

贈李白

二年客東都所歷厭機巧野人對羶腥蔬食常不飽

豈無青精

一作粃亦作鮓

飯使我顏色好苦乏大

一作買

藥資

山林跡如掃李侯金閨彥

陳浩然本作深

脫身事幽討亦作一

未 有梁宋遊方期拾瑤草

游龍門奉先寺

已從招提遊更宿招提境陰壑生虛

一作靈

籟月林散

清影天闕

一作闕興宗考異作闕

象緯逼雲臥衣裳冷欲覺

聞晨鐘令人發深省

望嶽

岱宗夫如何齊魯青未了造化鍾神秀陰陽割昏曉

盪胸生曾雲決皆入歸鳥會當凌絕頂一覽衆山小

陪李北海宴歷下亭

時邑人蹇處士等在坐李公序

東藩駐阜蓋北渚凌青荷一作清河海內一作右此亭古濟

南名士多雲山已發興玉珮仍當歌修竹不受暑交

流空湧波蘊真愜所遇落日將如何貴賤俱物役從

公難重過

登歷下古城員外草堂本此下有孫字新亭

北海太守李邕

吾宗固神秀體物寫謀長形制開古跡曾冰延樂方

太山雄地理巨壑眇雲莊高興泊陳浩然本作泊煩促永懷

清典常含宏知四大出入見三光負郭喜粳稻安時

諛吉祥

同前亭對鵲湖草堂諸本題作同李太守登歷下古城員外新亭

新亭結構罷隱見清湖陰跡籍臺觀舊氣溟海嶽深

圓荷想自昔遺堞感至今芳宴此時具一作俱哀絲一作

絃千古心主稱壽尊客筵秩宴北林北一作密不阻蓬華

興得兼兼一作得梁甫吟

元都壇歌寄元逸人

故人昔隱東蒙峯已佩含景蒼精龍故人今居子午

谷獨在一作竝陰崖結一作白茅屋屋前太古元都壇青

石漠漠常風寒子規夜啼山竹裂王母晝下雲旗翻

一作蟠知君此計成或作誠長往芝草琅玕日應長鐵鑱

高垂不可攀致身福地何蕭爽

今夕行自齊趙西歸至咸陽作

今夕何夕歲云徂更長燭明不可孤咸陽客舍一事

無相與博塞一云賭博為歡娛馮陵大叫呼五白袒跣不

肯成臯盧一作牟英雄有時亦如此邂逅豈即非良圖

君莫笑劉毅從來布衣願家無儋石輸百萬

貧交行

翻手作雲覆手雨紛紛輕薄何須數君不見管鮑貧  
時交此道今人棄如土

兵車行

車麟麟馬蕭蕭行人弓箭各在腰耶孃妻子走相送  
塵埃不見咸陽橋牽衣頓足攔橋一作道哭哭聲直上

干雲霄道傍過者問行人行人但云點行頻或從十  
五北防河便至四十西營田去時里正與裏頭歸來  
頭白還戍邊邊亭庭一作流血成海水武我一作皇開邊

意未已君不聞漢家山東二百州千村萬落生荆杞  
縱有健婦把鋤犁禾生隴畝無東西况復秦兵耐苦  
戰被驅不異犬與雞長者雖有問役夫敢申恨且如  
今年冬未休關隴一作西卒一云役夫心益憤如今縣官急

索租

草堂本作縣官云急索

租稅從何出信知生男惡反是生女

好生女猶是

一作得

嫁比鄰生男埋沒隨百草君不見

青海頭古來白骨無人收新鬼煩冤舊鬼哭天陰雨

濕聲

一作悲

啾啾

### 高都護驄馬行

安西都護胡青驄聲價歛然來向東此馬臨陣久無

敵與人一心成大功功成惠養隨所致飄飄一作遠

自流沙至雄姿未受伏櫪恩猛氣猶思戰場利腕促

蹄高如踣鐵交河幾蹴曾冰裂五花散作雲滿身萬

里方看汗流血長安壯兒不敢騎走過掣電傾城知

青絲絡頭爲君老何由却出橫門道

### 天育驃騎歌

吾聞天子之馬走千里今之畫圖無乃是是何意態

雄且傑駿

一作紫

尾蕭梢朔風起毛為綠縹兩耳黃眼

有驥炤雙瞳方矯矯

一作矯然

龍性

一云矯龍性逸

合

草堂本云東坡書作舍

變化卓立天骨森開張伊昔太僕張景順監牧攻駒

一云考牧攻駒一云考牧神駒

閱清峻遂令大奴守

一作字

天育別養驥

子憐神俊當時四十萬匹馬張公歎其材盡下故獨

寫真傳世人見之座右久更新年多物化空形影鳴

呼健步無由騁如今豈無驪衰與驊騮時無王良伯

樂死即休

### 白絲行

縑絲須長不須白越羅蜀錦金粟尺象

一作牙

床玉手

亂殷紅萬草千花動凝碧已悲素質隨時染

一作改

裂

下鳴機色相射美人細意熨帖平裁縫滅盡針線跡

春天衣著為君舞蛟蜺飛來黃鸝語落絮遊絲亦有

情隨風照日宜

一作疑

輕舉香汗輕塵汚顏色

一二云香汗清塵似微

汚又二云香汗清塵汚不著陳浩然本一二云香汗清塵似顏色

開新合故置何

一作相

許君不

見才

一作志

士汲引難恐懼棄捐忍羈旅

### 秋雨歎三首

雨中百草秋爛死階下決明顏色鮮著葉滿枝翠羽

蓋開花無數黃金錢涼風蕭蕭吹汝急恐汝後時難

獨立堂上書生空白頭臨風三嗅馨香泣

闌

一作蘭

風長

去聲一作伏荆公作仗

雨

一作東風細雨

秋紛紛四海

萬里

八荒同一雲去馬來牛不復辨濁涇清渭何當分禾

一作木

頭生耳黍穗黑農夫田婦

一作父

無消息城中斗

米換

一作抱

衾裯相許寧論兩相直

長安布衣誰比數反鑱衡門守環堵老夫不出長蓬

蒿稚子無憂走

讀作奏

風雨雨聲颼颼催早寒胡雁翅



濕高飛難秋來未曾

陳浩然本作省

見白日溷汚后

厚一作土

何時乾

歎庭前甘菊花

簷

一作階一作庭

前甘菊移時晚青藥重陽不堪摘明日蕭

條醉盡醒

一作盡醉醒

殘花爛熳開何益籬邊野外多衆

芳采擷細瑣升中堂念茲空長大枝葉結根失所纏

埋一作

風霜

醉時歌

贈廣文館博士鄭虔

諸公袞袞登臺

一作華

省廣文先生官獨冷甲第紛紛

厭梁肉廣文先生飯不足先生有道出羲皇先生有

才

一作所談一作所該一作所抱

過屈宋

或屈宋

德尊一代常坎軻

一作

名垂萬古知何用杜陵野客人更

見一作嗤被褐短

窄

穴一作

蠶如絲日糴太

泰一作

倉五升米時赴鄭老同

襟期得錢卽相覓沽酒不復疑忘形到爾汝痛飲真

一作直

吾師清夜沈沈動春酌燈前細雨簷花落

一作簷前

細雨燈花落

但覺高歌有

一作感

鬼神焉知餓死填溝壑相

如逸才親滌器子雲識字終投閣先生早賦歸去來

石田茅屋荒蒼苔儒術於我何有哉孔

聖

盜跖俱塵

埃不須聞此意慘愴生前相遇且銜盃

醉歌行

別從姪勤落第歸

陸機二十作文賦汝更小年能綴文總角草書又神

速世上兒子徒紛紛驊騮作駒已汗血鷲鳥舉翮連

青雲詞源

一作賦

倒流三峽水筆陣獨掃千人軍只今

年

浩然本

纔十六七射策君門第一舊穿楊葉真

自知暫蹶霜蹄未爲失偶然擢秀非難取會是排風

有毛質汝身已

一作卽

見唾成珠汝伯何由髮如漆春

光淡淹

草堂本作潭  
淹淹徒可切

秦東亭渚蒲芽白水荇青風吹客

衣日杲杲樹攬離思花冥冥酒盡沙頭雙玉瓶衆賓

皆

一作已

醉我獨醒乃知貧賤別更苦吞聲躑躅涕淚

零

### 贈衛八處士

人生不相見動如參與商今夕

此一作

復何夕共此燈

燭光

一二云共宿  
此燈光

少壯能幾時鬢髮各已蒼訪舊

魯作問

半

為鬼驚呼熱中腸焉知二十載重上君子堂昔別君

未婚兒女忽成行怡然敬父執問我來何方問答乃

未已

陳浩然作  
未及已

兒女

一作驅兒

羅酒漿夜雨剪春韭新

一作晨

炊間

一作聞

黃梁主稱會面難一舉累

一作蒙

十觴十觴

一云百觴

亦不醉

一作辭

感子故意長明日隔山岳世事兩

茫茫

苦雨奉寄隴西公兼呈王徵士

隴西公即漢中王瑀徵士琅琊王淑

今秋乃淫雨仲月來寒風羣木水光下萬象一作雲

氣中所思礙行潦九里信不通悄悄素澹路迢迢天

漢東願騰六尺馬一作駒背若孤征鴻劃見公一作君子

面超然懽笑同奮飛既胡越局促傷樊籠一飯四五

起憑軒心力窮嘉蔬沒溷濁時菊碎榛叢鷹隼亦屈

猛烏鳶何所蒙式瞻北鄰居取適南巷翁挂席釣川

漲焉知清興終

同諸公登慈恩寺塔

時高適薛據先有此作

高標跨蒼天一作穹烈風無時休自非曠一作壯士懷登

茲翻百憂方知象教力足一作立可追冥搜仰穿龍蛇

窟始出一作驚枝撐幽七星在北戶一作北河漢聲西流

羲和鞭白日少昊行清秋秦一作秦非山忽破碎涇渭不

可求俯視但一氣焉能辨皇州  
回首叫虞舜蒼梧雲  
正愁惜哉瑤池飲燕一作日晏崑崙邱黃鵠去不息哀  
鳴何所投君看隨陽雁各有稻梁謀

示從孫濟

平明跨驢出未知一作適誰門權門多噂噤且復尋

諸孫諸孫貧無事宅舍如荒村堂前自生竹堂後自

生萱萱草秋已死竹枝霜不蕃一作淘米少汲水汲

多井水渾刈葵莫放手放手傷葵根阿翁嬾惰久覺

兒行步奔所來一作為宗族亦不為盤飧小人利口

實一二云小人實利口薄俗難可一作論勿受外嫌猜同姓古所

敦

九日寄岑參

出門復入門兩陳作脚但一作如一作舊所向泥活

活

浩浩一作

思君令人瘦沈吟坐西

秋一作

軒

軒窗下一

飲

飯

食錯昏晝寸步曲江頭難為一相就吁嗟呼

乎一作

作

蒼生稼穡不可救安得誅雲師疇能補天漏大明韜

日月曠野號禽獸君子強逶迤小人困馳驟維南有

崇山恐

嶙一作

與川浸溜是節

時一作

東籬菊紛披為誰

秀岑生多新詩

語一作

性亦嗜醇耐采采黃金花何由

滿

酒一作

衣袖

### 送孔巢父謝病歸遊江東兼呈李白

巢父掉頭不肯住東將入海隨烟霧詩卷長留天地

間釣竿欲拂珊瑚

三二云

樹深山大澤龍蛇遠春寒野

陰風景暮

一云花繁草青春日暮

蓬萊織女迴雲車指點虛無是

征路

一作引

自是君身有仙骨世人那得知其故惜

君只欲苦死留富貴何如草頭露

一云我欲苦留君富貴何如草頭易晞露蔡

侯靜者意有餘清夜置酒臨前除罷琴惆悵月照荆席幾歲寄我空中書南尋禹穴見李白道甫問信點今何如

飲中八仙歌

知章騎馬似乘船眼花落井水底眠汝陽三斗始朝

天道逢

白氏長慶集注逢作見

麴車口流涎恨不移封向酒泉左

相日興費萬錢飲如長鯨吸百川銜盃樂聖稱世刊邵

避作賢宗之蕭灑美少年舉觴白眼望青天皎如玉樹

臨風前蘇晉長齋繡佛前醉中往往愛逃禪李白一

斗詩百篇長安市上酒家眠天子呼來不上船自稱

臣是酒中仙張旭三盃草聖傳脫帽露頂王公前揮

毫落紙如雲烟焦遂五斗方卓然高談雄辯驚四筵

曲江三章章五句

曲江蕭條秋氣高，菱荷枯折隨風濤。遊子空嗟垂二  
毛，白石素沙亦相蕩。哀鴻獨叫求其曹。

卽事非今亦非古，長歌激越梢林莽。比屋豪華固難  
數，吾人甘作心似灰。弟姪何傷淚如雨。

自斷此生休問天，杜曲幸有桑麻田。故將移住南山  
邊，短衣匹馬隨李廣。看射猛虎終殘年。

麗人行

楊慎曰：古本稱身下有足，下何所着？紅渠羅襪穿  
鐙，銀篋考宋刻本，並無知楊氏僞託也。今削正。

三月三日天氣新，長安水邊多麗人。態濃意遠淑且  
真，肌理細膩骨肉勻。繡畫一作羅衣裳，照暮春。蹙金孔

雀，銀麒麟頭上。何所有？翠微

爲一作

盞

烏合反，一作勺。葉，一作勺。

垂鬢脣背

身一作

後何所見？珠壓腰

一作轡，其

穩稱身

就中雲幕椒房親，賜名大國號。與秦紫駝之峯

一作珍

出翠釜，水精之盤行。素鱗犀筋，厭飫久未下。鑿刀縷



切空

一作坐

紛綸黃門飛鞚不動塵御廚絡繹一作絲絡送

八珍簫鼓

一作管

哀吟感鬼神賓從雜一作合還實要津

後來鞍馬何逡巡當軒

一作道

下馬入錦茵楊花雪落

覆

音副

白蘋青鳥飛去銜紅巾炙手可熱勢一作世絕倫

慎莫近

一作向

前丞相嗔

樂遊園歌

晦日賀蘭楊長史筵醉中作

樂遊古園萃

一作萃

森爽煙絲碧草萋萋長公子華筵

勢最高秦川對酒平如掌長生木瓢示真率更調鞍

馬狂歡賞青春波浪芙蓉園白日雷霆夾一作甲城仗

聞闔晴開映

一作誅

蕩蕩曲江翠幕排銀榜拂水低徊

舞袖翻緣雲清切歌聲上却憶年年人醉時只今未

醉已先悲數莖白髮那拋得百罰

一作刻

深盃亦不辭

英華作辭不辭

聖朝亦已

一作

知賤士醜一物自

一作但

荷皇天

慈

一作私

此身飲罷無歸處獨立蒼茫自詠詩

### 漢陂行

岑參兄弟皆好奇攜我遠來遊漢陂天地黓慘忽異  
色波濤萬頃堆琉璃琉璃汗漫泛舟入事殊興極憂  
思集鼉作鯨吞不復知惡風白浪何嗟及主人錦帆  
相爲開舟子喜甚無氛埃鳧鷖散亂棹謳發絲管啁  
啾空翠來沈竿續蔓深莫測菱葉荷花靜

一作淨

如拭

宛在中流渤澥清下歸無極

一云下臨無地

終南黑半陂已

南純浸山動影裏窈冲融間船舷暝戛雲際寺水面  
月出藍田關此時驪龍亦吐珠馮夸擊鼓羣龍趨湘  
妃漢女出歌舞金支翠旗光有無咫尺但愁雷雨至  
蒼茫不曉神靈意少壯幾時奈老何向來哀樂何其

多

漢陂西南臺

高臺面蒼陂六月風日冷蒹葭離披去天水相與永  
 懷新目似擊接要心已領仿佛識鮫人空蒙辨魚艇  
 錯磨終南翠顛倒白閣影峭一作蓄峯增光輝一作陰乘  
 陵惜俄頃勞生愧嚴鄭外物慕張邴世復輕驕騶吾  
 甘雜鼃黽知歸俗可忽取適一作足事莫並身退豈待  
 官老來苦便平聲靜况資菱芡足庶結茅茨迥從此具  
 扁舟彌年逐清景

戲簡鄭廣文

虔

兼呈蘇司業

源明

廣文到官舍繫

一作置

馬堂階下醉則

一作即

騎馬歸頗

遭官長罵才名四

一作三

十年坐客寒無羶賴

一作近

有

蘇司業時時與

一作乞

酒錢

夏日李公

家一云李

見訪

李時為太子家令按宗室世系表當是李炎

黃鶴曰

遠林暑氣薄公子過我遊貧居類舟塢僻近城南樓  
旁舍頗澹朴所願樊陳並亦易求隔屋喚西家借問  
有酒不牆頭過濁醪展席俯長流清風左右至客意  
已驚秋巢多衆鳥鬪喧一作葉密鳴蟬稠苦遭一作道此  
物聒孰謂陳作吾廬幽水花晚色靜樊作庶足充淹  
留預恐樽中盡更起爲君謀

奉同郭給事湯東靈湫作

東山氣鴻濛宮殿居上頭君來必十月樹羽臨九州  
陰火煮玉泉噴薄漲巖幽有時浴赤日光抱空中樓  
闥風入轍跡曠廣一作原野一作延冥搜沸拂一作天萬乘  
動觀水百丈湫幽靈靈云斯一作可佳怪一作王命官  
屬休初聞龍用壯擘石摧林邱中夜窟宅改移因風  
雨秋倒懸瑤池影屈注蒼江流味如甘露漿揮弄滑

且柔翠旗淡偃寒雲車紛少留簫鼓蕩四溟異香泱

泔浮鮫人獻微一作徵綃曾祝沈豪牛百祥奔盛明古

先莫能儔坡陀金蝦蟆出見蓋有由至尊顧之笑王

母不肯遣一作收復歸虛無底化作長黃虬與虬一云龍飄

飄一云青瑣郎文采珊瑚鈎浩歌淥水曲清絕聽者

愁

夜聽許十損一本作許十一無損字誦詩愛而有作

許生五臺賓業白出石壁余亦師粲可身猶縛禪寂

何階子方便謬引為匹敵離索晚相逢包蒙欣有擊

誦詩渾一作混遊衍四座皆一作俱辟易應手看捶鈎清

心聽鳴鏑精微穿溟滓飛動摧霹靂陶謝不枝梧風

騷共推激紫燕舊作鸞非自超詣翠駁誰剪剔君意人莫

知人間夜寥聞

橋陵詩三十韻因呈縣內諸官

先帝昔晏駕茲山朝百靈崇岡擁象設沃野開天庭

卽事壯重險論功超五丁坡陁因一作用厚地一作力却

略羅峻屏雲關虛冉冉風松肅泠泠石門霜露一作霧

白玉殿莓苔青宮女晚一作曉知曙祠官一作臣朝見星

空梁簇畫戟陰井敲銅瓶中使日夜繼一云日繼夜正

惟王心不寧豈徒郵備享尚謂求無形孝理敦國政

神凝推道經瑞芝產廟柱好鳥鳴一作宿巖局高岳

前嶺峯洪河左滢潏滢玉篇同滢胡切鳥迴二切無營音熒字

金城蓄峻趾沙苑交迴汀永與奧區固川原紛眇

冥居然赤縣立臺榭爭岌亭官屬果稱是聲華真一作

宜可聽王劉美竹潤裴李春蘭馨鄭氏才振古啖侯

筆不停遣辭必中律利物常發硎綺繡相展轉琳琅

愈一作逾

青熒側聞魯恭化秉德崔瑗銘太史候鳧影

王喬隨鶴翎朝儀限霄漢客思迴林垆轆軻辭下杜

飄颻陵濁涇諸生舊短褐旅泛一浮萍荒歲兒女瘦

暮途涕泗零主人念老馬廨署

字一作容

客一作

秋螢流

寓理豈愜窮愁醉未醒何當擺俗累浩蕩乘滄溟

### 沙苑行

君不見左輔白沙如白水

一作白水

繚以周牆百餘里

龍媒昔是渥洼生汗血今稱獻於此苑中駉牝三千

匹豐草青青寒不死食之豪健西域無

西域云騰

每歲

攻

一作收

駒冠邊鄙王有虎臣司苑門入門天廐皆

雲屯驪驪

一骨獨當御春秋二時歸

一作朝

至尊至尊

內外馬盈億

鮑作內外馬數將盈億

伏櫪在垆空大存逸羣絕足

信殊傑倜儻權奇難具論纍纍埶阜藏奔究往往坡

阨縱超越角壯翻同騰一作麋鹿遊浮深簸蕩鼃鼉窟

泉海一作出巨魚長比人丹砂作尾黃金鱗豈知異物

同精氣雖未成龍亦有神

驄馬行太常梁卿勅賜馬也李鄧公愛而有之命甫製詩

鄧公馬癖人共知初得花驄大宛種夙昔傳聞思一

見牽來左右神皆竦雄姿逸態何嶄崿顧影驕嘶自

矜寵隅目青熒夾鏡懸肉駿荆作驥礧礧連錢動朝來

久草堂作少試華軒下未覺千金滿高價赤汗微生白雪

毛銀鞍却覆香羅帕卿家舊賜公取之二云能取天廐

真龍此其亞晝洗須騰涇渭深朝荆作夕趨可刷幽

并夜吾聞良驥老始成此馬數年人更驚豈有四蹄

疾于鳥不與八駿俱先鳴時俗造次那得致雲霧晦

冥方降精近聞下詔喧都邑肯使一作騏驎地上行



去矣行

君不見韞上鷹一飽則飛掣焉能作堂上燕銜泥附  
炎熱野人曠蕩無覩顏豈可久在王侯間未試囊中  
餐玉法明朝且入藍田山

自京赴奉先縣詠懷五百字

天寶十四載十一月初作

杜陵有布衣老大意轉拙許身一何愚樊作竊比稷

與契居然成濩落白首甘苦契闊蓋棺事則已此

志常覬豁窮年憂黎元歎息腸一作腹內熱取笑同學

翁浩歌彌激烈非無江海志蕭洒送一作送日月生逢

堯舜君一二云堯為君不忍便永訣當今廊廟具構廈豈云

缺葵藿傾太陽物性固莫一作難奪顧惟螻螻輩但自

求其穴胡為慕大鯨輒擬偃溟渤以茲悟生理獨恥

事干謁兀兀遂至今忍為塵埃沒終愧巢與由未能

易其節沉飲聊自適遣一作放歌頗愁絕歲暮百草零

疾風高岡裂天衢陰崢嶸客子中夜發霜嚴衣帶斷

指直不得能一作結凌晨過驪山御榻在嵒嶮蚩尤塞

寒空蹴踏崖谷滑瑤池氣鬱律羽林相摩戛君臣云一

聖君留懽娛樂動殷樛嶠荆作樛葛一作螭蝎一賜浴皆長

纓與宴謀一作非短褐彤廷所分帛本自寒女出鞭撻

箠一作其夫家聚斂貢城闕聖人筐篚恩實欲願一作邦

國活臣如忽至理君豈棄此物多士盈朝廷仁者宜

戰慄况聞內金盤盡在衛霍室中堂舞一作神仙烟

霧散蒙一作玉質煖客蒙一云貂鼠裘悲管逐清瑟勸客

馳蹄羹霜橙壓香橘朱門酒肉翁一作臭路有凍死骨

榮枯咫尺異惆悵難再述北轅就涇渭官渡又改轍

羣冰一作從西下極目高崒兀疑是崆峒來恐觸天

柱折河梁幸未坼枝撐聲窸窣行旅相攀援川廣不

且一作可越老妻寄荆作異縣十口隔風雪誰能久不

顧庶往共饑渴入門聞號咷幼子飢一作已卒吾寧

捨一哀里巷亦陳作嗚咽所愧為人父無食致夭折

豈知秋未禾一作登貧窶有倉卒生常陳作免租稅各

不隸征伐撫迹猶獨一作酸辛平人固騷屑默思失業

徒因念遠戍卒憂端齊際一作終南瀕洞不可撥

奉先劉少府新畫山水障歌英華題云新畫山水障歌奉先尉劉單宅作

堂上一作不合生楓樹怪底江山一作起烟霧聞君

掃却赤縣圖乘興遣畫滄洲趣畫師亦無數好手不

可遇對此融心神知君重毫素豈但祁岳與鄭虔筆

迹遠過楊契丹得非元圃裂一作無乃瀟湘翻悄然

坐我天姥下耳邊已似聞清猿反思前夜風雨急乃

一作

是蒲

一作

城鬼神入元氣淋漓障猶濕真宰上

訴天應泣野亭春還雜花遠漁翁暝踏孤舟立滄浪

水深青溟闊

英華云滄浪之水深且闊

敲岸側島

英華云款峯側岸

秋毫末不

見湘妃鼓瑟時至今斑竹臨江活劉侯天機精愛畫

入骨髓自有兩兒郎揮灑亦莫比大兒聰明到能添

老樹巔崖裏小兒心孔開貌音得山僧及童子若耶

溪雲門寺吾獨胡為在泥滓青鞋布襪從此始

白水縣崔少府十九翁高齋三十韻

天寶十五載五月作

客從南縣來浩蕩無與適旅食白日長况當朱炎赫

高齋坐林杪信宿遊衍聞清晨陪躋攀傲睨俯峭壁

崇岡相枕帶曠野懷

一作迴

咫尺始知賢主人贈此

遣愁寂危堦根青冥曾冰生淅瀝上有無心雲下有

欲落石泉聲聞復急

一作息

動靜隨所擊

陳作激

鳥呼藏

其身有似懼彈射吏隱道陳作適一作通情性茲焉其窟宅

白水見舅氏諸翁乃仙伯杖黎長松陰作尉窮谷僻

爲我炊雕胡逍遙展良覲坐久風頗愁一作怒晚來山

更碧相對十丈蛟歛翻盤渦坼何得空裏雷殷殷尋

地脈烟氛一作氣藹齒一作齒萃翹翹森慘戚崑崙崆峒

顛迴首如一云知不隔前軒頽一作摧反照巉絕華岳赤

兵氣漲林巒川光雜鋒鏑知是相公軍鐵馬雲霧一作

煙積玉觴淡無味羯奴豈強敵長歌激屋梁淚下流

衽席人生半哀樂天地有順逆慨彼萬國夫休明備

征狄一作敵猛將紛填委廟謀蓄長策東郊何時開帶

甲且來荆作未釋欲告清宴罷一作疲難拒幽明迫三歎

酒食旁何由似平昔

三川觀水漲二十韻天寶十五載七月中避寇時作

珍傲宋版印

我經華原來不復見平陸北上唯土山連天走窮一作

等谷火雲無時出無一云出飛電常在目自多窮岫雨

行潦相逐蹙蒼音鳥勺音音又川氣黃羣流會空曲清

晨望高浪忽謂陰崖踣音音恐泥竄蛟龍登危聚麋鹿

枯查卷拔樹礪魄共充塞聲吹鬼神下勢閱人代速

不有萬穴歸何以尊四瀆及觀泉源漲反懼江海覆

漂沙拆岸去去一作岸激壑松柏禿乘陵陳作破山門迴

幹裂一作地軸交洛赴洪河及關豈信宿應沈數州

沒如聽萬室哭穢濁殊未清風濤怒猶蓄何時通舟

車陰氣不亦一云黠黷浮生有蕩汨吾道正羈束人寰

難容身石壁滑側足雲雷此一作不已艱險路更踣

普天無川梁欲濟願水縮因悲中林士未脫衆魚腹

舉頭向蒼天安得騎鴻鵠

悲陳陶

孟冬十郡良家子血作陳陶澤中水野曠一作廣天清

一作晴無戰聲四萬義軍同日死羣胡歸來血一作雪洗

箭仍唱一云燃箭胡歌飲都市都人迴面向北啼日夜更

望官軍至一云前後官軍苦如此

悲青坂

我軍青坂在東門天寒飲馬太白窟黃頭奚兒日向

西數騎彎弓敢馳突山雪河冰野一作晚樂蕭颼一作颼

一作颼青是烽一作人烟白人骨焉得附書與我軍忍待明

年莫倉卒

哀江頭

少陵野老吞聲哭春日潛行曲江曲江頭宮殿鎖千

門細柳新蒲為誰綠憶昔霓旌下南苑苑中萬物生

顏色昭陽殿裏第一人同輦隨君侍君側輦前才一作

詞人帶弓箭白馬嚼一作嚙一作齧黃金勒翻身向天一作空一作

仰射雲一箭考異作笑蔡君謨作發正墜雙飛翼明眸皓齒今何

在血污遊魂歸不得清渭東流劍閣深去住彼此無

消息人生有情淚沾臆江水一作草一作江花豈終極黃昏

胡騎塵滿城欲往城南忘南北一作城一作城北

### 哀王孫

長安城頭頭白鳥一作樊一作多一作白鳥一作頸一作白鳥夜飛延秋門上呼又向

一作來一作人家啄大屋屋底達官走避胡金鞭斷折九馬

死骨肉不待一作得一作同馳驅腰下寶玦青珊瑚可憐王

孫泣路隅問之不肯道姓名但道困苦乞為奴已經

百日竄荆棘身上無有完肌膚高帝子孫盡隆一作高一作

準龍種自與常人殊豺狼在邑龍在野王孫善保千



金軀不敢長語臨交衢且為王孫立斯須昨夜東一作

春風吹血腥東來橐駝一作駝滿舊都朔方健兒好身

手昔何勇銳今何愚竊聞天一作太子已傳位聖德北

服南單于花門勞面請雪恥慎勿出口他人狙一作狙

哀哉王孫慎勿疎五陵佳氣無時無

### 大雲寺贊公房四首

心在水精域衣霑春雨時洞門盡徐步深院果幽期

到一作倒扉一作屣開復閉撞鐘齋及茲醍醐長發性

飲一作飯食過扶衰把臂有多日開懷無媿辭黃鸝一作

鶯度結構紫鴿下罌罍一作芳菲愚一作旂意會所適花邊

行自遲湯休起我病微笑索題詩

細軟青絲履光明白氎巾深藏供老宿取用及吾身

自顧轉無趣交情何尚新道林才不世惠遠德過人

雨瀉暮簷竹風吹青一作春井芹天陰對圖畫最覺潤

龍鱗

燈影照無睡心清聞妙香夜深殿突兀風動金銀鐺

天黑閉春院地清棲暗芳玉繩迴斷絕鐵鳳森翱翔

梵放時出寺鐘殘仍殷牀明朝在沃野苦見塵沙黃

時西郊逆賊拒官軍未已

童兒汲井華慣捷海錄作健瓶上一作在手露灑不濡地

掃除似無箒明一作晨霞爛複閣霽霧寒高牖側塞被

徑花飄颻委墀一作堦柳艱難世事迫隱遁佳期後晤

語契深心那能總鉗口奉辭還杖策暫別終回首泱

泱一作泱泱泥汚人听听國多狗既未免羈絆一作寓時來

既奔走近公如白雪執熱煩何有

杜工部集卷第一

天... 入... 國... 尚... 長... 未... 承... 壽... 輪... 中... 計... 來...  
 曉... 采... 心... 帶... 蒲... 錦... 口... 香... 積... 歲... 好... 幾... 曾... 恨... 然... 回... 首... 共...  
 空... 於... 國... 隨... 委... 職... 事... 世... 事... 似... 謂... 數... 封... 贈... 榮... 部...  
 歸... 余... 心... 無... 帝... 賦... 事... 難... 關... 賦... 降... 露... 寫... 奉... 高... 誠... 佩... 塞... 葱...  
 靈... 氣... 又... 共... 華... 貴... 莫... 能... 變... 離... 土... 三... 壯... 手... 靈... 氣... 不... 論... 世...  
 發... 對... 耕... 出... 幸... 靈... 鐘... 別... 標... 林... 映... 閣... 五... 天... 雲... 龍... 宮... 壯... 麗... 以...  
 天... 聖... 降... 春... 物... 賦... 青... 野... 韶... 音... 正... 臨... 四... 道... 臨... 龜... 鳳... 舞... 祥... 雲...  
 登... 海... 鏡... 無... 缺... 心... 膏... 蘭... 似... 香... 交... 氣... 飄... 奕... 八... 風... 傳... 金... 馬... 嘶...  
 而... 舞... 臺... 對... 風... 吹... 青... 華... 林... 蒼... 天... 送... 樓... 閣... 鐘... 聲... 隨... 風... 散...

杜工部集卷第二目錄

古詩四十二首

蘇端薛復筵簡薛華醉歌

晦日尋崔戢李封

雨過蘇端

喜晴

送率府程錄事還鄉

述懷

送長孫九侍御赴武威判官

送樊二十三侍御赴漢中判官

送從弟亞赴安西判官

送韋十六評事充同谷郡防禦判官

塞蘆子

彭衙行

北征

得舍弟消息

徒步歸行

玉華宮

九成宮

羌村三首

偁仄行贈畢曜

送李校書二十六韻

洗兵馬

留花門

病後遇王倚欽贈歌

湖城東遇孟雲卿復歸劉顥宅宿宴飲散因爲

醉歌

閩鄉姜七少府設鱸戲贈長歌

戲贈閩鄉秦少公短歌

李鄠縣丈人胡馬行

義鶻

畫鶻行

瘦馬行

新安吏

潼關吏

石壕吏

新婚別

垂老別

無家別

夏日歎

夏夜歎

早秋苦熱堆案相仍

立秋後題

杜工部集卷第二目錄

杜工部集卷第二

古詩四十二首

避賊至鳳翔行在及歸  
鄜州還京師出華州作

蘇端薛復筵簡薛華醉歌

文章有神交有道端復得之名譽早愛客滿堂盡豪

翰

一作傑

開筵上日月

一作月

思芳草安得健步移遠梅亂

插繁花向晴昊千里猶殘舊冰雪百壺且試開懷抱

垂老惡聞戰鼓悲急

一作掛

觴為緩憂心擣少年努力

縱談笑看我形容已枯槁坐中薛華善

一作能

醉歌歌

辭

一云醉歌

自作風格老近來海內為

無一作

長句汝與山

東李白好何劉沈謝力未工才兼鮑昭愁絕倒諸生

頗盡新知樂萬事終傷不自保氣酣日落西風來願

吹野水添

一作注

金盃如澆之酒常快意亦如

荆作不知窮

愁

英華作未  
知窮達

安在哉忽憶雨時秋井塌古人白骨生青



苔如何不飲令心哀

晦日尋崔戢李封晦日謂正月晦日

朝光入甕牖尸一作方寢驚弊裘起行視天宇春氣

漸和柔興來一云得興不暇嬾今晨梳我頭出門無所

待徒一作徒步覺自由杖藜復恣意免值公與侯晚定

崔李交會心真罕傳每過得酒傾一作二宅可淹留

喜結仁里懽况因令節求李生園欲荒舊一作竹頗

修修引客看掃除隨時成獻酬崔侯初筵色已畏空

尊愁未知天下士至一作性有此不草牙既青出蜂

聲亦暖遊思見農器陳何當甲兵休上古葛天民不

貽黃屋一作憂至今阮籍等熟醉為身謀威鳳高其

翔一云自長鯨吞九州地軸為之翻百川皆亂流當

歌欲一放淚下恐莫收濁醪有妙理庶用一云慰沈

浮

雨過蘇端端置酒

雞鳴風雨

雲一云

交久旱雲亦好杖藜入春泥無食起

我早諸家憶所歷一飯

一作飽

跡便掃蘇侯得數過權

喜每傾倒也復

復一作也

可憐人呼兒具梨棗濁醪必在

眼盡醉攄懷抱紅稠屋角花碧委

秀一作

牆隅草親賓

縱

絕一作

談謔喧鬧畏衰老

畏一作

况蒙霈澤垂糧粒或

自保妻孥隔軍壘撥棄不擬道

喜晴

喜雨一云

皇天久不雨既雨晴亦佳出郭眺西郊蕭蕭

蕭蕭一作

春

增華青熒陵陂麥窈窕桃李

杏一作

花春夏各有實我

飢豈無涯干戈雖橫放慘澹鬪龍蛇甘澤不猶愈且

耕今未賒丈夫則帶甲婦女終在家力難及黍稷得

種菜與麻千載商山芝往者東門瓜其人骨已朽

滅

此道誰疵瑕英賢遇軾軻遠引蟠泥沙顧慚昧所

適迴首白日斜漢陰有鹿門滄海有靈一作雲查焉能

學衆口咄咄空一作同咨嗟

送率府程錄事還鄉程攜酒饌相就取別

鄙夫行衰謝抱病昏妄一作忘集常時往還人記一不

識十程侯晚相遇與語才傑立薰然耳目開頗覺聰

明入千載得鮑叔末契有所及意鍾一作中老柏青義

動修虵螫若人可數見慰我垂白泣告別無淹晷百

憂復相襲內愧突不黔庶羞以一云庶調給素絲挈

長魚碧酒隨玉粒途窮見交態世梗悲路澁東風吹

春冰泱莽草堂本后土濕念君惜羽翮既飽更思戢

莫作翻雲鶻聞呼向禽急

述懷一首

此以下自賊中  
竄歸鳳翔作

去年潼關破妻子隔絕久今夏草木長脫身得西走  
麻鞋見天子衣袖露兩肘朝廷慙生還親故傷老醜  
涕淚授拾遺流離主恩厚柴門雖得去未忍卽開口  
寄書問三川不知家在否比聞同罹禍殺戮到雞狗  
山中漏茅屋誰復依戶牖摧頽蒼松根地冷骨未朽  
幾人全性命盡室豈相偶嶽岑一作猛虎場鬱結迴  
我首自寄一封書今已十月後反畏消息來寸心亦  
何有漢運初中興生平老耽酒沈思歡會處恐作窮  
獨一作叟

送長孫九侍御赴武威判官

驄馬新鑿蹄銀鞍被來好繡衣黃白郎騎向交河道  
問君適萬里取別何草草天子憂涼州嚴程到須早

去秋羣胡反不得無電掃此行收陳作遺吐風俗方

再造族父領元戎名聲國晉作中老奪我同官良飄

颯按城堡使我不能餐令我惡懷抱若人才思闊溟

漲浸漫一作絕島尊前失詩流塞上得多一作國寶皇天

悲送遠雲雨白浩浩東郊尚烽火朝野色枯槁西極

柱亦傾如何正穹昊

送樊二十三侍御赴漢中判官

威弧不能弦自爾無寧歲川谷血橫流豺狼沸相噬

天子從北來長驅振凋敝頓兵岐梁下却跨沙漠裔

二京陷未收四極我得制蕭索瑟一作漢水清緬通淮

湖稅使者紛星散王綱尚旒綴南伯從事賢君行立

談際生坐一作知七曜歷手畫三軍勢冰雪淨聰明雷

霆走精銳幕府輟諫官朝廷無此比一作例至尊方肝

食仗爾布嘉惠補闕暮徵入柱史晨征樊作補闕入柱史晨征固

多正當艱難時實藉長久計迴風吹獨樹白日照執

袂慟哭蒼烟根山門萬重一作里閉居人莽牢落遊子

方迢遞徘徊悲生離局促老一世陶唐歌遺民後漢

更列一作別帝恨無匡復姿一作資聊欲從此逝

### 送從弟亞赴安西河西判官

南風作秋聲殺氣薄炎熾盛夏鷹隼擊時危異人至

令弟草中來蒼然一作茫請論事詔書引上殿奮舌動

天意兵法五十家爾腹為篋笥應對如轉丸疏通略

文字經綸皆新語足以正神器宗廟尚為灰君臣俱

一作皆下淚崆峒地無軸青海浩然本天軒輕一作未詳

西極最瘡痍連山暗烽燧帝曰大布衣藉卿佐元帥

坐看清流沙所以子奉使歸當再前席適遠非歷一作

虛試須存武威郡為畫長久利孤峯石戴驛快馬金

纏轡黃羊飫不饒蘆魯一作酒多還醉踴躍常人情慘

澹苦士志安邊敵何有反正計始遂吾聞駕鼓車不

合用騏驎龍吟迴其頭夾輔待所致

送韋十六評事充同谷郡防禦判官

昔沒賊中時潛與子同遊今歸行在所王事有去留

偏側兵馬間主憂急良籌子雖軀幹小老一作氣橫

九州挺身艱難際張目視寇讎朝廷壯其節奉詔令

參謀鑾輿駐鳳翔同谷為咽喉西扼弱水道南鎮枹

罕一作氏羌陬此邦承平日剽劫吏所羞况乃胡未滅控

帶莽悠悠府中韋使君道足示懷柔令姪才俊茂二

美又何求受詞太白腳走馬仇池頭古色一作沙土

裂積陰雪雲一作霜雪稠一作積雪一作陰雲稠一作羌父豪猪靴一作帽一作羌兒

青兕裘

晉作漢兵  
黑貂裘

吹角向月窟蒼山

一作  
山蒼

旌旆愁鳥驚

出死樹龍怒拔老湫古來無人境今代橫戈矛傷哉

文儒士憤激馳林邱中原正格鬪後會何緣由百年

賦命定豈料沈與浮且復戀良友握手步道周論兵

遠壑淨亦可縱冥搜題詩得秀句札翰時相投

### 塞蘆子

五城何迢迢迢迢隔河水邊兵盡東征城內空荆杞

思明割懷衛秀巖西未已迴

一作  
迴

略大荒來

一作  
東

嶠

函蓋虛爾延州秦北戶關防猶可倚焉得一萬人疾

驅塞蘆子歧

一作  
頃

有薛大夫旁制山賊起近聞昆戎

徒爲退三百里蘆關扼兩寇深意實在此誰能

晉作  
敢

叫帝闈

陳作  
門

胡行速如鬼

### 彭衙行



憶昔避賊初北走經險艱夜深彭衙道一作門月照白

水山盡室久徒步逢人多厚顏參差谷鳥吟一作鳴不

見遊子還癡女饑咬我啼畏虎狼一作猛虎聞懷中掩其

口反側聲愈嗔小兒強解事故索苦李餐一旬半雷

雨泥濘相牽攀既無禦雨一作濕備徑滑衣又寒有時

經一作最契闊竟日數里間野果充糒糧卑枝成屋椽

早行石上水暮宿天邊烟少留周一作固家窪欲出

蘆子關故人有孫宰高義薄曾雲延客已曛黑張燈

啓重門煖湯濯我足翦紙招我魂從此出妻孥相視

涕闌干衆雛爛熳睡喚起沾盤殮誓將與夫子永結

爲弟昆遂空所坐堂安居奉我懽誰肯艱難際豁達

露心肝別來歲月周羯胡仍構患何當有翅翎飛去

墮爾前

北征歸至鳳翔墨制  
放往鄭州作

皇帝二載秋閏八月初吉杜子將北征蒼茫問家室

維時遭艱虞危一作朝野少暇日顧慚恩私被詔許歸

蓬華拜奉一作辭詣闕下閣門一云怵惕久未出雖乏諫諍

姿恐君有遺失君誠中興主經緯固密勿東胡反未

已臣甫憤所切揮涕戀行在道途路一作猶恍惚乾坤

含陳浩然本作合瘡痍憂虞何時畢靡靡踰阡陌人烟渺蕭

瑟一作索所遇多被傷呻吟更流血迴首鳳翔縣旌旗

晚明滅前登寒山重屢得飲馬窟邠郊入地底涇水

中蕩涵猛虎立我前蒼崖吼時裂菊垂今秋花石戴

一作帶一作載古車轍青雲動高興幽事亦可悅山果多瑣

細羅生雜橡栗或紅如丹砂或黑如點漆雨露之所

濡甘苦酸一作齊結實緬縹一作思桃源內益歎身世拙

坡陀望鄜時巖谷一作谷巖互出沒我行已水濱我僕猶

木末鳴鳥一作鼻鳴黃桑野鼠拱亂穴夜深一作中經戰

場寒月照白骨潼關百萬師往者散一作敗何卒遂令

半秦民殘害為異物况我墮一作隨胡塵及歸盡華髮

經年至茆屋妻子衣百結慟哭松聲迴一作迴悲泉共

幽一作鳴咽平生所嬌兒顏色白勝雪見耶背面啼垢

膩腳不襪床前兩小女補綻才一作纒過邾海圖拆波

濤舊繡移曲折天吳及紫鳳顛倒在裋一作短褐老夫

情懷惡嘔泄一作咽臥數日一二云數日那無一作能囊中帛

救汝寒凜慄粉黛亦解苞衾裯稍羅列瘦妻面復光

癡女頭自櫛學母無不為曉妝隨手抹移時施朱鉛

狼藉畫眉闕生還對童稚似欲忘飢渴問事競挽鬚

誰能即嗔喝翻思在賊愁甘受雜亂聒新歸且慰意

生理焉得說一作脫至尊尚蒙塵幾日休練卒仰觀一作

看天色改坐一作旁覺祆氣一作氣豁陰風西北來慘澹

隨回鶻一作胡紇其王願助順其俗善一作喜馳突送兵五

千人驅馬一萬匹此輩少為貴四方服勇決所用皆

鷹騰破敵過一作如箭疾聖心頗虛佇時議氣欲奪伊

洛指掌收西京不足拔官軍請深入蓄銳何一作可陳浩然本作

伺俱發此舉開青徐旋瞻略恆碣昊天積霜露正氣

有肅殺禍轉亡胡歲勢成擒胡月胡命其能久皇綱

未宜絕憶昨狼狽初事與古先別姦臣竟菹醢同惡

隨蕩析不聞夏殷當作殷周衰中自誅褒姒周漢獲再興

宣光果明哲桓桓陳將軍仗鉞奮忠烈微爾人盡非

于今國猶活淒涼大同殿寂寞白獸闈都人望翠華

佳氣向金闕園陵固有神掃灑數不缺煌煌太宗業

樹立甚宏達

得舍弟消息

風吹紫荆樹色與春庭暮花落辭故枝風迴返無處  
骨肉恩書重漂泊難相遇猶有淚成河經天復東注

徒步歸行

贈李特進自鳳翔赴  
鄜州途經邠州作

明公壯年值時危經濟實藉英雄姿國之社稷今若  
是武定禍亂非公誰鳳翔千官且飽飯衣馬不復能  
輕肥青袍朝士最困者白頭拾遺徒步歸人生交契  
無老少論交一作心何必先同調妻子山中哭向天須  
公櫪上追風驃

玉華宮

溪迴

一作迴

松風長蒼鼠竄古瓦不知何王殿遺構絕

壁下陰房鬼火青壞道哀湍瀉萬籟真笙竽

一作竽瑟

秋

色一作氣正極一作蕭灑美人為黃土况乃粉黛假當

時侍金輿故物獨石馬憂來藉草坐浩歌淚盈把冉

冉征途間誰是長年者

### 九成宮

蒼山八百里崖斷如杵白曾宮憑風迴一作岌業土

囊口立神扶棟梁字一作鑿翠開戶牖其陽產靈芝其

陰宿牛斗紛披扶一作長松倒側一作揭嶭怪石走哀猿

啼一聲客淚迸林藪荒哉隋家帝製此今頽朽向使

國不亡焉為巨唐有雖無新增修尚置官居守巡非

瑤水遠跡是雕牆後我行一作屬時危仰望嗟歎久

天王守晉晁並作狩太白駐馬更搔一作回首

### 羗村

崢嶸赤雲西日腳下平地柴門鳥雀噪歸客一云千

珍做宋版印

里至妻孥怪我在驚定一作走還拭淚世亂遭飄蕩生

還偶然遂鄰人滿牆頭感歎亦戲敝夜闌更秉燭相

對如夢寐

晚歲迫偷生還家少歡趣嬌兒不離膝畏我復却去

憶昔好一作多追涼故繞池邊樹蕭蕭北風勁撫事煎

百慮賴知禾黍一作黍稌收已覺糟牀注如今足斟酌

且用慰遲暮

羣雞正一作忽亂叫客至雞鬪爭正生驅雞上樹木始

聞扣柴荆父老四五人問我久遠行手中各有攜傾

榼濁復清苦一作莫辭酒味薄黍地無人耕兵革既未

息兒童一作郎盡東征請為父老歌艱難媿深一作餘情

歌罷仰天歎四座淚縱橫

偈仄行贈畢曜一二云德德行篇中字亦作德德英華作贈畢四曜

偏仄何偏仄我居巷南子巷北可恨鄰里間十日不

一見顏色自從官馬送還官行路難行澁如棘我貧

無乘非無足昔者相過今不得實不是一作未敢愛微軀

相訪云慵又非關足無力徒步翻愁官長怒此心炯炯

君應識曉來急雨春風顛睡美不聞鐘鼓傳東家蹇

驢許借我泥滑不敢騎朝天已令請急會通籍已云

把牒還請假還男兒信一作性命絕可憐焉能終日心拳拳憶

君誦詩神凜然辛夷始花亦一作又已落况我與子非

壯年街頭酒價常苦貴方外酒徒稀醉眠速宜徑一作

相就飲一斗恰有三百青銅錢

送李校書二十六韻

代北有豪鷹生子毛盡赤渥洼騏驎兒一作種尤異是

龍一作虎脊李舟名父子清峻流樊作時輩伯人間好少



妙一作年不必須白哲十五富文史十八足賓客十九

授校書二十聲輝一作煇赫衆中每一見使我潛動

魄自恐二男兒辛勤養無益乾元元一作二年春萬姓

始安宅舟也衣綵衣告我欲遠適倚門固有望斂衽

就行役南登吟白華已見楚山碧藹藹咸陽都冠蓋

日雲一作已如積何時太夫人堂上會親戚汝翁草明光

天子正前席歸期豈爛漫別意終感激顧我蓬屋姿

謬通金閨一作門籍小來習性懶晚節一作歲慵轉劇每

愁悔吝作如覺天地窄羨君齒髮新行己能夕惕臨

岐意頗切對酒不能喫迴身視綠野慘澹如荒澤老

鴈春忍陳作忍春饑哀號待枯麥時哉高飛鷺絢練新羽

翻長雲濕袞斜漢水饒巨石無令軒車遲衰疾悲夙

昔

洗兵馬收京後作

中興諸將收山東捷書日荆作夜報清晝同河廣傳

聞一葦過胡危命在破竹中祇殘鄴城不日得獨任

朔方無限功京師皆騎汗血馬回紇餒肉葡萄宮已

喜皇威清海岱常思仙仗過崆峒三年笛裏關山月

萬國兵前草木風成王功大心轉小郭相謀深一作謀

深一作謀古來少司徒清鑒懸明鏡尚書氣與秋天杏二

三豪俊為時出整頓乾坤濟時了東走無復憶鱸魚

南飛覺有安巢鳥青春復隨冠冕入紫禁吳本作駕正耐

烟花繞鶴禁通霄鳳輦備雞鳴問寢龍樓一作地曉攀

龍附鳳勢一作世莫當天下盡化為侯王汝等豈知蒙

象一作帝力時來不得誇身強關中既留蕭丞相幕下

復用張子房張公一生江海客身長九尺鬚眉蒼徵

起適遇風雲會扶顛始知籌策良青袍白馬更何有  
後漢今周喜再昌寸地尺天皆入貢奇祥異瑞爭來  
送不知何國致白環復道諸山得銀甕隱士休歌紫  
芝曲詞人解西溪叢語善本作角撰河清一云清河頌田家望望惜雨  
乾布穀處處催春種淇上健兒歸莫嬾城南思婦愁  
多夢安得壯士挽天河淨洗甲兵長不用

留花門

北門

一作北方一作花門

天驕子飽肉氣勇決高秋馬肥健挾矢

射漢月自古以為患詩人厭薄伐脩德使其來羈縻

固不絕胡為傾國至出入暗金闕中原有驅除隱忍

用此物公主歌黃鵠君王指白日連雲屯左輔百里

見積雪長戟烏休飛哀笳曙

一作曉

幽咽田家最恐懼

麥倒桑枝折沙苑臨清渭泉香草豐潔渡河不用船

千騎常撒烈一云滅沒正胡塵踰太行雜種抵京室花

門既須留原野轉蕭瑟

病後遇過一作王倚飲贈歌

鱗角鱗一作鱗魚鳳觜世莫識辨一作煎膠續弦奇自見尚看

王生抱此懷在于甫也何由羨且遇王生慰疇昔素

知賤子甘貧賤酷見凍陳一作餒不足取多病沈年苦

無健王生怪我顏色惡答云伏枕艱難徧瘡癘三秋

孰可忍寒熱百日相交戰頭白眼暗坐有胝肉黃皮

皺命如綫惟生哀我未平復為我力致美肴膳遣人

向市賒香粳喚婦出房親自饌長安冬菹酸且綠金

城土酥靜如練兼求富豪一作畜豪一作畜豕且割鮮密沽斗酒

諧終宴故人情義味一作晚誰似令我手脚輕欲游一作

老馬為駒信總一作不虛當時得意况深眷但使殘

年飽喫飯只願無事常相見

湖城東遇孟雲卿復歸劉顥宅宿宴飲散因爲

醉歌蔡本題上有冬末以事之東都七字

疾風吹塵暗河縣行子隔手不相見湖城城南一作東

一開眼駐馬偶識雲卿面向非劉顥爲地主嬾迴鞭

轡成高一作城南宴劉侯歎一作歡我攜客來置酒張燈促

華饌且將款曲終今夕一作今冬休語一作話艱難尙酣

戰照室紅爐促曙光一作英華作縈窗素月垂文一作秋練

天開地裂長安陌一作春寒盡春生一作紫洛陽殿豈

知驅車復同軌可惜刻漏隨更箭人生會合不可常

庭樹雞鳴淚如綫一作云

閩鄉姜七少府設餼戲贈長歌

姜侯設餼當嚴冬昨日今日皆天風河凍未漁一作云取魚

一云黃河美魚一云黃河冰魚一云黃河味魚不易得鑿冰恐侵河伯宮饗人受

魚鮫人手洗魚磨刀魚眼紅無聲細下飛碎一作素雪

有骨已剝觜平聲春葱偏勸腹腴愧年少軟炊香飯一作

粳緣老翁落碁何曾白紙濕放筋未覺金盤空新歡

便飽姜侯德清觴異味情屢極東歸貪一作貧路自覺

難欲別上馬身無力可憐為人好心事於我見子真

顏色不恨我衰子貴時悵望且為今相憶

戲贈閩鄉秦少公陳浩然本作翁草堂作少府短歌

去年行宮當一作守太白朝迴君是同舍客同心不減

骨肉親每語見許文章伯今日時清兩京道相逢苦

覺人情好昨夜邀歡樂更無多才依舊能潦倒

李鄠縣丈人胡馬行

丈人駿馬名胡騶前年避胡一作賊過金牛迴鞭却走

見天子朝飲漢水暮靈州自矜胡騶奇絕代乘出千  
人萬人愛一聞說盡急難材轉益愁向駑駘輩頭上  
銳耳批秋竹腳下高蹄削寒玉始知神龍別有種不  
比俗一作凡馬空多肉洛陽大道時再清累日喜得俱  
東行鳳臆龍髻一作龍麟一作麟髻未易識側身注目長風  
生

義鶻宋刻諸本皆曰義鶻行惟吳若本無行字

陰崖有蒼一作二鷹養子黑栢顛白虵登其巢吞噬一作

之恣一作資朝餐雄飛遠求食雌者鳴辛酸力強不可

制黃口無一作寧半存其父從西歸一作來翻身入長烟

斯須領健鶻痛憤一二云憤滿二云冤憤寄所宣斗上捩孤影噉哮

無一作聲來九天修鱗脫遠枝巨顙折老拳高空得蹭蹬

短一作茂草辭蜿蜒折尾能一掉一作擺飽腸皆一作今已

一作以云已皆穿生雖滅衆雛死亦垂千年物情有報復快

意貴目前茲實鷲鳥最急難心炯一作皎然功成失所

往一作在用捨何其賢近經潘水湄此事樵夫一作人傳

飄蕭覺素髮凜欲一作烈衝儒冠人生許與一作計分

只在亦存顧盼間聊為義鶻行用一作永激壯士肝

畫鶻行一作畫雕

高堂見生一作老鶻颯爽動秋骨初驚無拘攣一作卷何

得立突兀乃知畫師妙功一作巧到造化窟寫作一作此

神俊姿充君眼中物烏鵲滿樛枝軒然恐其出側腦

看青霄寧為衆禽沒長翮如刀劍人寰可超越乾坤

空崢嶸粉墨且蕭瑟緬思一作想雲沙際自有烟霧質

吾今意何傷顧步獨紆鬱

瘦馬行英華作老馬



東郊瘦一作老馬使我傷骨骼一作骸碑兀如堵牆絆之

欲動轉欹側此豈有意仍騰驤細看六一作火非印帶官

字衆道三一作官軍遺路旁皮乾剝落雜一作盡泥滓毛

暗蕭條連雪霜去歲奔波逐餘寇驕不慣不得將

士卒多騎內廐馬惆悵恐是病乘黃當時歷塊誤一

蹶委棄非汝能一作難周防見人慘澹若哀訴失主錯

莫無晶光天寒遠放雁為伴一作侶日暮不一作未收烏

啄瘡一云不衣鳥作瘡誰家且養願終惠更試明年春草長

新安吏收京後作雖收兩京賊猶充斥

客行新安道喧呼聞點兵借問新安吏縣小更無丁

府帖一作符昨夜一作日下次選中男行中男絕短小何

以守王城肥男有母送瘦男獨伶俜白水暮東流青

山猶一作聞哭聲莫自使眼枯收汝淚縱橫眼枯即一作

却見骨天地終無情我軍取一作至相州日夕望其平  
豈意賊難料歸軍星散營就糧近故壘練卒依舊京  
掘壕不到水牧一作看馬役亦輕况乃王師順撫養甚  
分明送行勿泣血一作垂泣僕射如父兄

### 潼關吏

士卒何草草築城潼關道大城鐵不如小城萬丈餘  
借問潼關吏修關一作築城還備胡要我下馬行爲我指  
山隅連雲列戰格飛鳥不能踰胡來但自守豈復憂  
西都丈一作大人視要處窄一作穿狹容單車艱難奮長  
戟萬一作吳本古用一夫哀哉桃林戰百萬化爲魚請囑  
防關將慎勿一作莫學哥舒

### 石壕吏

暮投石壕村有吏夜捉人老翁踰牆走老婦出門看

蘇潤公本作  
老婦出看門

吏呼一何怒婦啼一何苦聽婦前致詞三

男鄴城戍一男附書至

一作到

二男新戰死存

一作在者

且

一作是

偷生死者長已矣室中更無人惟

文粹作所

有乳

下孫有孫母未去

陳浩然本作  
孫有母未去

出入

一作更

無完裙

孫母云

未便出見  
吏無完裙

老嫗力雖衰請從吏夜歸急應河陽役猶得

備晨炊夜久語聲絕如聞泣幽咽天明登前途獨與

老翁別

### 新婚別

兔絲附蓬麻引蔓故

一作固

不長嫁女與征夫不如棄

路旁結髮為妻子

樊作子妻

席不煖君床暮婚晨告別無

乃太匆忙君行雖

一作既

不遠守邊赴

一作戍

河陽妾身

未分明何以拜姑嫜父母養我時日夜

草堂本  
作月夜

令我

藏生女有所歸雞狗

一作犬

亦得將君今往死地

陳浩然本

君今死生地草堂  
本君生往死地

沈痛迫中腸誓欲隨君去

一作往

形勢

反蒼黃勿為

一作改

新婚念努力事戎行婦人在軍中

兵氣恐不揚自嗟貧家女久致羅襦裳羅襦不復施

對君洗紅妝仰視百鳥飛大小必雙翔人事

一作生

多

錯迕與君永相望

### 垂老別

四郊未寧靜垂老

一作死

不得安子孫陣亡盡焉用身

獨完投杖出門去同行為辛酸幸有牙齒存

一作好

所

悲骨髓

一作肉

乾男兒既介冑長揖別上官老妻臥路

啼歲暮衣裳單孰知是死別且復傷其寒此去必不

歸還聞勸加餐土門壁甚堅杏園度亦難勢異鄴城

下縱死時猶

一作獨

寬人生有離合豈擇衰老

一作盛

端

憶昔少壯日遲迴竟長歎萬國盡征戍

一作東征

烽火被

岡巒積屍草木腥流血川原丹何鄉為樂土安敢尚  
盤桓棄絕蓬室居塌然摧肺肝

無家別

寂寞天寶後園廬但蒿藜我里百萬一作餘家世亂各

東西存者無消息死者為委一作塵泥賤子因陣敗歸

來尋舊故一作蹊久行見空巷室一作日瘦氣慘悽但對

狐與狸豎毛怒我啼四鄰何所有一二老寡妻宿鳥

戀本枝安辭且窮棲方春獨荷鋤日暮還灌畦縣吏

知我至召令習鼓鞞雖從本州役內顧無所攜近行

止一身遠去終轉迷家鄉既盪盡遠近理亦齊永痛

長病母五年委溝谿生我不得力終身兩酸嘶人生

無家別何以為蒸黎

夏日歎

夏日出東北陵天經晉作經中街朱光徹厚地鬱蒸

何由開上蒼久無雷無乃號令乖雨降不濡物良田

起黃埃飛鳥苦熱死池魚涸其泥萬人尚流冗舉目

唯蒿萊至今大河北化一作盡作虎與豺浩蕩想幽薊

王師安在哉對食不能餐我心殊未諧眇然貞觀初

難與數子偕

### 夏夜歎

永日不可暮炎蒸毒我一作中腸安得萬里風飄颻吹

我裳昊天出華月茂林延疎光仲夏苦夜短開軒納

微涼虛明見纖毫羽蟲亦飛揚物情無巨細自適固

其常念彼荷戈士窮年守邊疆何由一洗濯執熱互

相望竟夕擊刁斗喧聲連萬方青紫雖被體不如早

還鄉北城悲笳發鶴鶴號且翔况復一作懷煩促倦激

烈思時康

早秋苦熱堆案相仍時任華州司功

七月六日苦炎蒸一作熱對食暫餐還不能每一作常愁

夜中一作來自足蝎况一作仍乃秋後轉一作復多蠅束帶

發狂欲大叫簿書何急來相仍南望青松架短一作絕

壑安得一作能赤腳踏層冰

立秋後題

日月不相饒節序昨夜隔元蟬無停號秋燕已如客  
平生獨往願惆悵年半百罷官亦由人何事拘形役

杜工部集卷第二

杜工部集卷第三目錄

古詩七十八首

貽阮隱居

遣興三首

昔遊

幽人

佳人

赤谷西崦人家

西枝村尋置草堂地夜宿贊公土室二首

寄贊上人

太平寺泉眼

夢李白二首

有懷鄭十八司戶



遣興五首

遣興五首

遣興五首

前出塞九首

後出塞五首

別贊上人

萬丈潭

兩當縣吳十侍御江上宅

發秦州

赤谷

鐵堂峽

鹽井

寒碓

法鏡寺

青陽峽

龍門鎮

石龕

積草嶺

泥功山

鳳凰臺

乾元中寓居同谷縣作歌七首

發同谷縣

木皮嶺

白沙渡

水會渡

飛仙閣

五盤

龍門閣

石櫃閣

桔栢渡

劍門

鹿頭山

成都府

杜工部集卷第三目錄

杜工部集卷第三

古詩七十八首

寓秦州及同谷縣行赴蜀中作

貽阮隱居

助

陳留風俗衰人物世不數  
塞上得阮生迴繼先父祖  
貧知靜者性自晉作益  
毛髮古車馬入隣家蓬蒿翳  
環堵清詩近道要識子一作字  
用心苦尋我草徑微褰  
裳踏寒雨更議居遠村避喧  
甘猛虎足明箕穎客榮  
貴如糞土

遣興三首

下馬古戰場四顧但茫然  
風悲浮雲去黃葉墜一作墮

我前朽骨穴螻蟻又為蔓  
草纏故老行歎息今人尚

開邊漢虜互勝負樊作失約  
封疆不常全安得廉恥一作頗

將三軍同晏眠

高秋登塞寒一作山南望馬邑州降虜東擊胡壯健盡

不留穹廬莽牢落上有行雲愁老弱哭道路願聞甲

兵休鄴中事反覆蕭條一云何死人積如邱諸將已茅土

載驅誰與謀

豐年孰一云亦既云遲甘澤不在早耕田秋雨足禾黍

已映道春苗九月交顏色同日老勸汝衡門士勿悲

尚枯槁時來展材力先後無醜好但訝鹿皮翁忘機

對芳荒一作草

昔遊

昔謁華蓋君深求洞宮脚陳作綠袍玉人棺已上天

白日亦寂冥一作寞暮昇良岑晉作頂巾几猶未却弟

子四五人入來淚俱落余時游名山發軔在遠壑良

覲違夙願含凄晉作向寥廓林昏罷幽磬竟夜伏石

閣王喬下天壇  
微月映皓鶴  
晨溪嚮虛駛  
歸徑行已  
昨豈辭青鞵  
胝悵望一云惆悵  
金七藥東蒙  
赴舊隱尚憶

同志樂休一作伏  
事董先生于今  
獨蕭索胡為客  
關塞

道意久衰薄  
妻子亦何人  
丹砂負前諾  
雖悲鬢髮變

髮一云鬚  
未憂筋力弱  
扶一作杖  
藜望清秋  
有興入廬霍

幽人

孤雲亦羣遊  
神物有所歸  
麟一作靈  
鳳在赤霄  
何當一作

嘗一作  
一來儀往與  
惠荀一作詢  
輩中年滄洲  
期天高無消

息棄我忽若  
遺內懼非道  
流幽人見一作在  
瑕疵洪濤

隱語笑一作笑語  
鼓柷蓬萊池  
崔嵬扶桑日  
照曜珊瑚枝

風帆倚翠蓋一作  
暮把東皇衣  
嚙嗽元和津  
所思烟

霞一作霧  
微知名未足  
稱局促商山  
芝五湖復浩  
蕩歲

暮有餘悲

佳人

絕代有佳人幽居在空一作山谷自云良家子零落依

草木關中昔喪敗一作亂兄弟遭殺戮官高何足論不

得收骨肉世情惡衰歇萬事隨轉燭夫壻輕薄兒新

人已一作美如玉合昏尚知時鴛鴦不獨宿但見新人

笑那聞舊人哭在山泉水清出山泉水濁侍婢賣珠

迴牽蘿補茅屋摘花不插髮一作晉作鬢采柏動盈掬一作握

天寒翠袖薄日暮倚修竹

赤谷西崦人家

躋險不自喧一作荆作宣一作安出郊已清目溪迴日氣暖逕轉

山田熟鳥雀依茅茨藩籬帶松菊如行武陵暮欲問

桃花一作源宿

西枝村尋置草堂地宿贊公土室二首

出郭眇細岑披榛得微路溪行一流水曲折方屢渡  
贊公湯休徒好靜心迹素昨枉霞上作盛論岩中趣  
怡然共攜手恣意同遠步捫蘿澀先登陟巘眩反顧  
要求陽岡煖苦陟晉作步陰嶺沍惆悵老大藤沈吟屈  
蟠樹卜居意未展杖策迴且暮層巔一作天餘落日草  
蔓已多露

天寒鳥已歸月出人

山晉作

更一作已

靜土室延白光松

門耿疎影躋攀倦日短語樂寄夜永明燃林中薪暗

汲石底

一作泉

井大師京國舊德業天機秉從來支許

遊興趣江湖迴數奇謫關塞道廣存箕穎何知戎馬  
間復接塵事屏幽尋豈一路遠色有諸嶺晨光稍矇  
矓更越西南頂

寄贊上人



一昨陪錫杖卜隣南山幽年侵腰脚衰未便陰崖秋

重岡北面起竟日陽光留茅屋買置一作兼土斯焉心

所求近聞西枝西有谷杉黍漆一作稠亭午頗和暖石

沙一作田又足收當期塞寒一作雨乾宿昔齒疾瘳徘徊

虎穴上面勢龍泓頭柴荆具茶茗逕遙一作路通林邱

與子成二老來往亦風流

### 太平寺泉眼

招提憑高岡疎散連草莽出泉枯柳根汲引歲月古

石間一作門見海眼天畔滎水府廣深丈尺間宴息敢

輕侮青白二小虵幽姿可時覩如絲氣或上爛熳為

雲雨山頭到山下鑿井不盡土取供十方僧香美勝

牛乳北風起寒文弱藻舒勝一作翠縷明涵客衣淨細

蕩林影趣何當宅下流餘潤通藥圃三春溼黃精一

食生毛羽

夢李白二首

死別已吞聲生別常惻惻江南瘴癘地逐一作遠客無

消息故人入我夢明我長相憶恐非平生魂路遠一作

迷不可測魂來楓葉一作林青魂一作夢返關塞黑君今

在羅網何以一作似有羽翼落月滿屋梁猶疑照一作見

顏色水深波浪闊無使蛟龍得

浮雲終日行遊子久不至三夜頻夢君情親見君意

告歸常局促苦道來不易江湖多風波一云秋舟楫

恐失墜出門搔白首若一作苦負平生志冠蓋滿京華

斯人獨顛顛孰云網恢恢將老身一作才反累千秋萬

歲名寂寞身後事

有懷台州鄭十八司戶庚

天台隔三江江一云海風浪無晨暮鄭公縱得歸老病不

識路昔如水晉一作天江上鷗今如樊作置中免性命由

他人悲辛但狂顧山鬼獨一腳蝮虵長如樹呼號傍

孤城歲月誰與度從來禦魑魅多為一作才名誤夫

子愁阮流更被遭晉作時俗惡海隅微小吏眼暗髮垂

素黃帽映杖一云鳩青袍非供折腰具平生一杯酒見

我故人遇相望無所成乾坤莽迴互

遣興五首

螫龍三冬臥老鶴萬里心昔時賢俊人未遇猶視今

愁康不得死一云且孔明有知音又如壠底草堂作

松用捨在所尋大哉霜雪幹歲久為枯林

昔者一作龐德公未曾入州府襄陽耆舊間處士節

獨一作苦豈無濟時策一作終竟畏羅罟一作終歲林

茂鳥有歸水深魚知聚舉家依一作隱鹿門劉表焉得取

我今日夜憂諸弟各異方不知死與生何況道路長  
避寇一分散飢寒永相望豈無柴門歸一作掃欲出畏  
虎狼仰看雲中雁禽鳥亦有行

蓬生非無根漂蕩隨高風天寒落萬里不復歸本叢  
客子念故宅三年門巷空悵望但烽火戎車滿關東  
生涯能幾何常在羈旅中

昔在洛陽時親友相追攀送客東郊道遨遊宿南山  
烟塵阻長河樹羽成皋間迴首載酒地豈無一日還  
丈夫貴壯健慘戚非朱顏

### 遣興五首

朔風飄胡雁慘澹帶砂礫長林何蕭蕭秋草萋更碧

北里富薰天高樓夜吹笛焉知南隣客九月猶絺綌  
長陵銳頭兒出獵待明發駢一作解弓金爪鏑白馬蹴  
微雪未知所馳逐但見暮光滅歸來懸兩狼門戶有  
旌節

漆有用而割膏以明自煎蘭摧白露下桂折秋風前  
府中羅舊尹沙道尚依然赫赫蕭京兆今為時所憐  
猛虎憑其威往往遭急縛雷吼徒咆哮枝撐已在腳  
忽看皮寢處無復睛閃爍人有甚于斯足以勸一作戒  
元惡

朝逢

逆一作

富家葬前後皆

見一作

輝光共指親戚大總

麻百夫行送者各有死不須羨其強君看束練一作縛  
去亦得歸山岡

遣興五首

天用莫如龍有時繫扶桑頓轡海徒涌神人身更長  
性命苟不存英雄徒自強吞聲勿復道真宰意茫茫  
地用莫如馬無良復誰記此日千里鳴追風可君意  
君看渥洼種態與駑駘異不雜一作在蹄齧間逍遙有  
能事

陶潛避俗翁未必能達道觀其箸詩集頗亦恨枯槁  
達生豈是足默識蓋不早有子賢與愚何其掛懷抱  
賀公雅吳語在位常清狂上疏乞骸骨黃冠歸故鄉  
爽氣不可致斯人今則亡山陰一茅宇江一作淮海日  
淒涼

吾憐孟浩然短褐卽長夜賦詩何必多往往凌鮑謝  
清江空舊魚一作舊美魚春雨餘甘蔗每望東南雲令

人幾悲吒

前出塞九首

戚戚去故里悠悠赴交河公家有程期亡命嬰禍羅  
君已富土境開邊一何多棄絕父母恩吞聲行負戈  
出門日已遠不受徒旅欺骨肉恩豈斷男兒死無時  
走馬脫轡頭手中挑青絲捷下萬仞一作丈岡俯身試  
搴旗

磨刀鳴咽

呼一作

水水赤刃傷手欲輕腸斷聲心緒亂

已久丈夫誓許國憤惋復何有功名圖騏驎戰骨當  
速朽

送徒既有長遠戍亦有身生死向前去不勞吏怒嗔  
路逢相識人附書與六親哀哉兩決絕不復同一作問  
苦辛

迢迢萬餘里領我赴三軍軍中異苦樂主將寧盡聞

隔河見胡騎倏忽數百羣我始爲奴僕幾時樹功勳  
挽弓當挽強用箭當用長射人先射馬擒賊先擒王  
殺人亦有限列一作立國自有疆苟能制侵陵豈在多  
殺傷

驅馬天雨雪軍行入高山逕危抱寒石指落曾冰間  
已去漢月遠何時築城還浮雲暮南征可望不可攀  
單于寇我壘百里風塵昏雄劍四五動彼軍爲我奔  
虜其名王歸繫頸授轅門潛身備行列一勝何足論  
從軍十年餘能無分寸功衆人貴苟得欲語羞雷同  
中原有鬪爭况在狄與戎丈夫四方志安可辭固一作  
困窮

後出塞五首

男兒生世間及壯當封侯戰伐有功業焉能守舊邱



召募赴薊門軍動不可留千金買馬鞭一作鞍 百金裝

刀頭閩里送我行親戚擁道周斑白居易上列酒酣進

庶羞少年別有贈含笑看吳鉤

朝進東門營一作營門暮上河陽橋落日照大旗馬鳴風

蕭蕭平沙列萬幕部伍各見招中天懸明月令嚴夜

寂寥悲笳數聲動壯士慘不驕借問大將誰恐是霍

嫖姚

古人重守邊今人一作日重高勳豈知英雄主出師巨

英華作直長雲六合已一家四夸且孤軍遂使貔樊作虎

一作武士奮身勇所聞拔劍擊大荒日收胡馬羣誓開

玄冥北持以奉吾君

獻凱日繼踵兩蕃靜無虞漁陽豪俠地擊鼓吹笙竽

雲帆轉遼海粳稻來東吳越羅與楚練照耀輿臺軀

主將位益崇氣驕凌上都邊人不敢議議者死路衢  
我本良家子出師亦多門將驕益愁思身貴不足論  
躍馬二十年恐辜明主恩坐見幽州騎長驅河洛昏  
中夜間道歸故里但空村惡名幸脫免窮老無兒孫  
別贊上人

百川日東流客去亦不息我生苦一作若漂蕩何時有

終極贊公釋門老放逐來上國還爲世塵嬰頗帶顛

顛色楊枝晨在手豆子雨一作雨已熟是身如浮雲安

可限南北異縣逢舊友一作交初忻寫胸臆天長關塞

寒一作遠歲暮饑凍一作寒逼野風吹征衣欲別向曛黑

作曛馬嘶一作鳴思故櫪歸鳥盡斂翼古來聚散地宿

昔長荆棘相看俱衰年出處各努力

萬丈潭同谷縣作

青溪合趙鴻刻冥冥神物有顯晦龍依積水蟠窟壓

萬丈內跼步凌垠堦側身下烟靄前臨洪濤寬却立

蒼石大山危一徑盡崖岸一作絕兩壁對削成根虛無

倒影垂澹瀨趙作瀾黑如陳作爲灣濃底清見光炯

碎孤雲方輿倒來深飛鳥不在外高蘿成帷一作帳幄

寒木累壘一作旌旆遠川曲通流嵌竇潛洩瀨造幽無

人境發興自我輩告歸遺恨多將老斯遊最閉藏修

鱗蟄出入巨石趙作礙何事趙作暑一作炎天過快意

風雨雲一作會

兩當縣吳十侍御江上宅

寒城朝烟澹山谷落葉赤陰風千里來吹汝江上宅

鷄雞號枉渚日色傍阡陌借問持斧翁幾年長沙客

哀哀失木狢矯矯避弓翮亦知故鄉樂未敢思宿昔

昔在鳳翔都共通金閨一作門籍天子猶蒙塵東郊暗

長戟兵家忌間諜此輩常接跡臺中領舉劾君必慎

剖析不忍殺無辜所以分白黑上官權許與失意見

遷斥仲尼甘旅人向子識損益朝廷非不知閉口休

歎息樊本仲尼一聯在朝廷一聯下余時忝諍臣丹陛實咫尺相看受

狼狽至死難塞責行邁心多違出門無與適於公負

明義惆悵頭更白

發秦州

乾元二年自秦州赴同谷縣紀行十二首

我衰更嬾拙生事不自謀無食問樂土無衣思南州

漢源十月交天氣涼如秋草木未黃落况聞山水一作

東幽栗亭名更佳下有良田疇充腸多薯蕷崖蜜亦

易求密竹復冬筍清池可方舟雖傷一作云旅寓遠庶

遂平生遊此邦俯要衝實恐人事稠應接非本性登

臨未銷憂谿谷無異石塞田始微收豈復慰老夫一作

大惘一作然難久留日色隱孤戍烏啼滿城頭中宵

驅車去飲馬寒塘流磊落星月高蒼茫雲霧浮大哉

乾坤內吾道長悠悠

赤谷

天寒霜雪繁遊子有所之豈但歲月暮重來未有期

一云亦晨發赤谷亭險艱一作方自茲亂石無改轍

我車已載脂山深苦多風落日童稚饑悄然村墟迴

烟火何由追貧病轉零落一云飄零故鄉不可思常恐死

道路永為高人嗤

鐵堂峽

山風吹遊子縹緲乘險絕峽形藏堂隍壁色立積荆

鐵徑摩穹蒼蟠石與厚地裂修織無垠一作竹嵌

精

空

一作孔

太始雪威遲哀壑底徒旅慘不悅

一作徒懷

寒長冰橫我馬骨正折生涯抵弧失盜賊殊未滅飄

蓬踰三年迴首肝肺熱

### 鹽井

鹵中草木白青者官鹽烟官作既有程煮鹽烟在川

汲井歲

楫楫草堂本云

當作搯搯

出車日連連自公斗三百轉致

斛六千君子慎止足小人苦喧闐我何良歎嗟物理

固自然

一云亦固然

### 寒碇

行邁日悄悄山谷勢多端雲門轉絕岸積阻霾天寒

寒碇不可度我實

一作貧

衣裳單况當仲冬交泝泐增

波瀾野人尋烟語行子傍水餐此生免荷及未敢辭

路難

法鏡寺

身危適他州勉强終勞苦神傷山行深愁破崖寺古  
 嬋娟碧鮮淨蕭撼寒擇聚回回洞一作山石一作根水冉  
 冉松上雨洩雲蒙清晨初日翳復吐朱豐半光炯戶  
 牖粲可數拄枉一作策忘前期出蘿已亭午冥冥子規  
 叫微徑不復敢一作取

青陽峽

塞外苦厭山南行道登路云彌惡岡巒相經亘雲水氣  
 參錯林迴硤角來天窄穿一作壁面削磳西五里石奮  
 怒向我落仰看日車側俯恐坤軸弱魑魅嘯有有一作狂  
 風霜霰浩漠漠昨憶憶一作昨踰隴坂高秋視吳岳東笑  
 蓮華卑北知崆峒薄超然侔壯觀已謂殷隱一作寥廓  
 突不猶趁人及茲歎谷一作冥寞

龍門鎮

細泉兼輕冰沮洳棧道溼不辭辛苦行迫一作迨此短

景急石門雪雲一作雲雷隘一作溢古鎮峯巒集旌竿暮慘

澹風水白刃澀胡馬屯成皋防虞此何及嗟爾遠戍

人山寒夜中泣

石龕

熊羆咆我東虎豹號我西我後鬼長嘯我前狻又啼

天寒昏無日山遠道路迷驅車石龕下仲冬見虹蜺

伐竹一作木者誰子悲歌上一作抱雲梯為官採美箭五

歲供梁齊苦云直簞一作筓盡無以充一作應提攜奈何

漁陽騎颯颯驚蒸黎

積草嶺

連峯積長陰白日遞隱見颼颼林響交慘慘石狀變



山分一作外

積草嶺路異明水縣旅泊吾道窮一作東衰

年歲時倦卜居尚百里休駕投諸彥邑有佳主人情

如已會面來書語絕妙遠客驚深眷食蕨不顧餘茅

茨眼中見

泥功山

朝行青泥上暮在青泥中泥濘一作穽

非一時版築勞

人功不畏道途

一作路

永乃將

二云反將一云及此

汨沒同白馬為

鐵驪小兒成老翁哀猿

一作猴

透却墜死鹿力所窮寄

語北來人後來莫忽忽

鳳凰臺

山峻不至高頂

亭亭鳳凰臺北對西康州西伯今寂寞鳳聲亦悠悠

山峻路絕蹤石林氣高浮安得萬丈梯為君上上頭

恐有無母雛饑寒日啾啾

一云啾啾

我能剖心出

方輿勝覽作心血

飲啄慰孤愁心以當竹實炯然無方輿作忘外求血以當

醴泉豈徒比清流所重王者瑞敢辭微命休坐看綵

翮長一作舉舉一作縱意八極周自天銜瑞圖一作圖識飛下

十二樓圖以奉一作獻至尊鳳以垂鴻猷再光中興業

一洗蒼生憂深衷正方輿作止為此羣盜何淹留

乾元中寓居同谷縣作歌七首

有客有客字子美白頭亂一作短髮垂過一作兩耳歲拾

橡栗隨狙公天寒日暮山谷裏中原無書一作主歸不

得手腳凍皴皮肉死嗚呼一歌兮歌已一作獨哀悲風

為我從天一作東來

長鑱長鑱白木柄我生託子以為命黃精一作獨無苗

山雪盛短衣數挽不掩脛此時與子空一作同歸來男

呻女吟四壁靜嗚呼二歌兮歌始放鄰一作閭里為我

色惆悵

有弟有弟在遠方一作各三人各瘦何人強生別展

轉不相見胡塵暗天道路長東飛鴛鴦後鵝鷓安得

送我置汝旁嗚呼三歌兮歌三發汝歸何處收一作取

兄骨

有妹有妹在鍾離良人早歿諸孤癡長淮浪高蛟龍

怒十年不見來何時一作遲扁舟欲往箭滿眼杳杳南

國多旌旗嗚呼四歌兮歌四奏林猿一作竹林浩然為

我啼清晝

四山多風溪水急寒雨一作風颯颯枯樹一云樹枝溼黃蒿

古城雲不開白一作元狐跳梁黃狐立我生何為在窮

谷中夜起坐萬感集嗚呼五歌兮歌正長魂招不來

歸故鄉

南有龍兮在山湫古木龍嵒枝相膠木葉黃落龍正  
蟄蝮蛇東來水上遊我行怪此安一作寒敢出拔劍欲  
斬且復休嗚呼六歌兮歌思遲一云怨溪壑爲我迴  
春姿

男兒生不成名身已老三一作十一年饑走荒山道長安  
卿相多少年富貴應須致身早山中儒生舊相識但  
話宿昔傷懷抱嗚呼七歌兮悄終曲仰視皇天白日  
速

發同谷縣乾元二年十二月一日  
自隴右赴劍南紀行

賢有不黔突聖有不暖席况我饑愚人一作夫焉能尙  
安宅始來茲山中休駕喜一作嘉地僻奈何迫物累一  
歲四行役忡忡去絕境杳杳更遠適停驂龍潭雲迴  
首白一作虎崖石臨岐別數子握手淚再滴交情無舊

深一作雖無舊深知窮老多慘感平生嬾拙意偶值棲

遁跡去住與願違仰慚林間翮

### 木皮嶺

首路栗亭西尙想鳳皇村季冬攜童一作幼稚辛苦赴

蜀門南登木皮嶺艱險不易論汗流被我體祈寒爲

之暄遠岫一作峴爭輔佐千巖自崩奔始知五岳外別

更一作有見一作他山尊仰干一作看塞大明俯入裂厚坤

再聞虎豹鬪屢踟風水昏高有廢閣道摧折如短一作

斷一作轅下有冬青林石上走長根西崖特秀發煥若靈

芝繁潤聚金碧氣清無沙土痕憶觀崑崙圖一作墟目

擊元圃存對此欲何適默傷垂老魂

### 白沙渡

畏途隨長江渡口下絕岸差池上舟楫杳窅入雲漢

天寒荒野外日暮中流半我馬向北嘶山猿飲相喚  
水清石礚礚沙白灘漫漫迴一作條然洗愁辛多病一  
疎散高壁抵嶽崙一作岑洪濤越凌亂臨風獨迴首攬  
轡復三歎

水會渡一云水  
回渡

山行有常程中夜尙未安微月沒已久崖傾路何難  
大江動一作當我前洶若溟渤寬篙師暗理楫歌笑輕  
波瀾霜濃木石滑風急一作烈手足寒入舟已千憂  
陟巘仍萬盤迴一作出眺一作積水一作石外始知衆星  
乾遠遊令人瘦衰疾慚加餐

飛仙閣

土一作出

門山行窄微徑緣秋毫一云徑微  
上秋毫棧雲闌干峻

梯石結構牢萬壑欹疎林一作竹

積陰帶奔濤寒日外

淡泊長風中怒號歇鞍在地底始覺所歷高往來雜  
坐臥人馬同疲勞浮生有定分饑飽豈可逃歎息謂  
妻子我何隨汝一作爾曹

### 五盤

五盤雖云險山色佳有餘仰凌棧道閣一作云細俯映江

木疎地僻無網罟水清反多魚好鳥不妄飛野人半

巢居喜見淳朴俗坦然心神舒東郊尚格鬪巨臣一作

猶何時除故鄉有弟妹流落隨邱墟成都萬事好一作

在豈若歸吾廬

### 龍門閣

清江下龍門絕壁無尺土長風駕高一作白浪浩浩自

太古危途中縈盤一作縈道仰望垂綫縷滑石欹誰鑿

浮梁裏相拄目眩隕雜花頭風吹過雨一作飛雨過百年

不敢料一墜那得取飽聞一作經瞿塘足見度大庾  
終身歷艱險恐懼從此數

### 石櫃閣

季冬

冬一作季

日已長山晚半天赤蜀道多早花江間饒

奇石

石櫃曾波上臨虛蕩高壁清暉回羣鷗暝色帶

遠客羈棲負幽意感歎向絕跡信甘孱懦嬰不獨凍

餒迫優遊謝康樂放浪陶彭澤吾衰未自安一作謝

爾性所一作適

有

### 桔柏渡

青冥寒江渡駕竹爲長橋竿溼烟竿一云竹漠漠江永

水一作

風蕭蕭連竿動嫋娜征衣颯飄颻急流搗鷁散

絕岸鼉鼉驕西轅自茲異東逝不可要高通荆門路

闊會滄海潮孤光隱顧眄遊子悵寂寥無以洗心胸



前登但山椒

劍門

惟天有設險劍門閣一作天下壯連山抱西南石角皆

北向兩崖崇墉倚刻畫城郭狀一夫怒臨關門一作百

萬未可傍仰一作珠玉陳作玉鼎走中原岷峨氣悽愴三皇

五帝前雞犬各相自一作放後王尚柔遠職貢道已喪

至今英雄人高視見霸王并吞與割據極力不相讓

吾將罪真宰意欲鏟疊嶂恐此復偶然臨風默黯一作

惆悵

鹿頭山

鹿頭何亭亭是日慰饑渴連山西南斷俯見千里豁

遊子出京華一云咸京劍門不可越及茲險阻盡始喜原

野闊殊方昔二分霸氣曾間發天下今一家雲端失

雙闕悠然想揚馬繼起名碑兀有文一作才令人傷何  
處埋爾骨紅餘脂膏地慘澹豪俠窟仗鉞非老臣宣  
風豈專達冀公柱石姿論道邦國活斯人亦何幸公  
鎮踰歲月僕射裴冀公冕

成都府

翳翳桑榆日照我征衣裳我行山川異忽在天一方  
但逢新人民未卜見故鄉大江東流云一作東來遊子

去日

一作日月

長曾城填華屋季冬樹木蒼喧然名都會

吹簫間

一作奏

笙簧信美無與適側身望川梁鳥雀夜

各歸中原杳茫茫初月出不高衆星尙爭光自古有  
羈旅我何苦哀傷

杜工部集卷第三

...

...

...

...

...

...

...

...

...

...

...